



進香文
祭文
表辭
碑

年溪集
卷之十一

共十一

~ 16
2330
11



和
2330
2/11

耳溪集卷二十三目



進香文

大行王妃殯殿江華府進香文

大行大王大妃殯殿敦寧府進香文

祭文

宗廟夏享大祭親祭文

宗廟冬享大祭親祭文

王世子冠禮冊儲時 宗廟社稷告由祭文

永禧殿酌獻禮祭文

景慕宮親祭文

景慕宮親祭文

景慕宮冬享大祭親祭文

毓祥宮親祭文

毓祥宮親祭文

獻陵親祭文

溫陵酌獻禮遣大臣攝行祭文

弘陵親祭文

元陵親祭文

元陵親祭文

顯隆園親祭文

顯隆園親祭文

顯隆園親祭文

仁元大妃大漸時 宗廟社稷祈禱祭文

社稷祈穀大祭親祭文

祈雨祭文

北郊別厲祭祭文

東西南厲壇慰祭祭文

鷓述嶺祈雨文

利見臺祈雨文

兄江祈雨文

大角干墓祈雨文

兄江再禱文

社壇祈雨文

崇德殿祈雨文

角干墓再禱文

敬順王廟宇改建影幘移摹後奉安祭文

南原龍章書院合享祭文

左議政信度公慎守勤墓致祭文

延安南大池疏濬告由文



耳溪集卷二十三

進香文

大行王妃殯殿江華府進香文 丁丑

維天燾物化以坤成亦王建極教始家刑於皇我

后寤寐幽貞爰有 碩媛降自達城神襟玉粹令聞

蘭馨 寧考定祥在邸親迎禮成塗甲瑞叶橫庚同

升震闡若姒嬪京遂陟壺極允配陰靈迺及吾 王

惟德之行曰孝與順根於性情瞻真永慕嘗藥餘誠

承顏 太母溫其色盈 慈心則怡婦道以亨春秋

致恪載蠲醴牲 宮園展敬有沾衿纓三十四年謙

耳溪集 卷二十三
畏是程深深椒幄靡大色聲琴瑟在御珩珮和鳴箴
勤出月歌騰嘒星躬服女事懋茲統絃絳繪色菲肺
腑門清自天有申報德維禎星海潤輝日月貞明婉
婉 佳婦助我粢盛嶷嶷 神孫亦旣肆經斂五于
疇得一以寧星回重甲籌添六莫福與功崇名隨化
宏三冊編玉萬壽稱觥 二聖偕老百祿攸并川至
月恒遐不干齡嗚呼不弔維歲之丁維月之卯坤軸
震傾青蒲位撤素柰災呈涕漣環笄痛均黎萌哀我
貳極在疚嬛嬛 至尊典悼潛德是銘申命太史節
以鴻名儀嘉物備禮極哀榮靈辰不留玄宅載營

先寢左瞻其麓維鶯龍鼓肇啓鳳翼遐征舍此顯塗
卽彼幽扃雷號咽巷雨泣盈庭伏念臣職叨居留化
沾資生遙瞻桂掖莫攀仙輶禮具辦香時維薦櫻日
辰云良觴豆惟精有臨洋洋庶斯歆聽

大行大王大妃殯殿敦寧府進香文

維天 祖宗眷我東方篤生 聖女以配 寧王光
紹 二妃範成六宮如坤承乾有美黃中於皇 聖
考四紀勵精治本躬行教先家刑陰功默贊內裨箴
言維時 聖后若唐長孫母我 二聖壹心止慈顧
復恩摯燕翼謨垂宮闈之間和氣融穆維時 聖后

耳溪集 卷二十三
若漢明德粵歲重光邦猷艱危尺綸夜降遺旨是述
基奠泰磐慶長宗禋維時 聖后若宋宣仁天報思
齊降以靈芴光流瑟瓊頌騰縣飀 文子繼志京婦
嗣音維時 聖后若周太任不顯惟德無競匪烈汗
竹雖罄彤管詎悉先思以勗錫我建極民到于今繫
誰之力持盈以謙處尊逾約家無仕廡篋有衣濯五
十六年尊臨一國歛用箕福化躋壽域千乘備養彝
鼎瑤觴十冊揚徽玉編金章羨及孫曾含飴繞膝福
履之盛振古無匹如山不騫如月方恒皇穹不吊坤
馭先升 慈心有憾玉度乍愆天監 聖孝不日瘳

遄嗚呼降割三月丁卯民之無祿喪我 聖母皇皇
露禱邈邈天聽哭遍窮谷人來絕瀛末命諄諄惟民
國費樽壘仍昔銀絹出笥嚴廬七耄奠饋六時有文
述美有墨鐫碑瞻彼鶯麓飄然鳳翼洋洋月遊萬歲
同榻神理無憾 孝思猶慰哀此下民永失依恃伏
念臣等俱忝懿戚恭荷 慈覆恩深渥海報茂涓露
有羞其潔有苾其馨於昭在上庶鑑菲誠

祭文

宗廟夏享大祭親祭文

奕奕 清廟百世觀德 聖神靈承慶流無極律回

耳溪集 卷二十三
仲呂樂奏九成陟降孔邇庶顧粢盛

宗廟冬享大祭親祭文

陟降洋洋 清廟翼翼基命宥密萬世觀德節屆冬
烝躬薦黍稷昭假孔邇啓佑無極

王世子冠禮冊儲時 宗廟社稷告由祭文

於皇 列聖積德累仁啓佑後昆主鬯有人姿克岐
嶷頌重輝輪策定豫建節屆仲春元服肇加冊命維
新國本永鞏天休用申先烈攸暨景祿滋臻涓吉祇
告庶歆明禋

永寧殿

於昭陟降保佑無疆毓祉衍慶錫我元良豫建長策
式遵舊章禮成三加位正少陽邦錄永緜先烈有光
吉蠲承休俾熾而昌

社稷

厚德陰功基我邦命國本有托神人同慶元服肇加
貳極誕正俯鑑祇告景祿無競

永禧殿酌獻禮祭文

第一室

於赫 藝祖肇造東方勗業垂統啓佑無疆翼翼
真殿端冕黼裳 四聖靈承躋享一堂小子奉璋祇

再漢集 卷二十三
觀耿光洋洋降臨萬世永昌

第二室

光廟中興再奠邦基德配 三宗運啓一治肅肅
影殿穆穆袞儀萬歲承禧 五聖聯帷殷春祇見九
旂龍旂於昭在上顧我明粲

第三室

溫溫 章陵潛德發祥篤降 聖嗣整我天常有儼
真幘德容睟盎貽謨定命景祿彌昌節屆春仲躬奉
裸將皇靈降監歆此馨香

第四室

丕顯 肅廟一德配天深仁厚澤四十六年望雲就
日寶榻巍然 皇祖大孝禋祀罔愆昔陪獻瓚今來
奉籩昭假不遲庶監誠虔

第五室

於穆 皇祖五紀邳隆法天配地盛德豐功玉軸銀
綃堯眉舜瞳愀然入室倍激微衷錫我祚胤慶流無
窮恭薦洞酌庶幾感通

景慕宮親祭文

瞻彼 闕宮窮天永慕詩廢蓼莪痛纏風樹大德必
祿餘慶在後 仙寢卜吉玄穹垂佑歲丁聖降日符

慈眸錫我主器基奠磐泰休惟無疆感增不洎禮舉
冬烝節屆陽至躬奉圭瓚愀然如覲薰蒿悽愴庶幾
臨格

景慕宮親祭文

天眷我家於千萬禩今年何年吉祥鼎至 東朝五

甲 慈宮六旬元朝吉慶躬薦明禋

景慕宮冬享大祭親祭文

節屆亞歲氣回一陽感深霜露慕增羹墻日瞻餘誠
大禧躬將陟降孔邇昭假洋洋

毓祥宮親祭文

翼翼祠宮毓德啓祚 皇祖大孝八耄猶慕每歲

親裸昔陪龍旂先庚再回前星重輝錫羨之祥萬世
彌永感切追遠禮宜告慶晬日躬薦優然如昨洋洋
孔邇庶歆洞酌

毓祥宮親祭文

日近南至慶滂長發每歲躬禋 皇祖是述酌彼靈
泉盎醴孔潔追遠展誠永享芬苾

獻陵親祭文

於赫 烈祖纘業垂統本支百世邦錄永鞏小子承
儲昔年陪謁松檜在望霜露屢閱卅載重省俯仰增

愴陟降儼臨庶幾顧饗

溫陵酌獻禮遣大臣攝行祭文

於顯 聖后 靖陵元妃密贊中興夙正壺儀勲臣
千紀恩禮有替厚坤失寧率土飲涕內政再虛二臣
叫闈異議橫發忠言莫伸淒涼瑤華翟禕永閨荏苒
百年人心掩抑 明陵光御尺疏上格建春夜出
宸章悽惻 廟儀體重僉謀不一禮物雖加盛典終
闕逮我 寧考大孝適追因事興感命官守祠適會
此時草野進言 聖心默契 慈旨誕宣 中廟遺
批糟糠不忘 先王末年久猶嗟傷爰命宗伯亟舉

盛禮改號上謚躋室親祭故劔重返缺月再圓象設
既備 園陵有神 七廟增光百世永垂於萬斯曆
第祿洪基小子嗣服緬焉興懷協洽歲屆舟梁甲回
元春展誠穀朝于差行乃遲遲逾月淹時遙瞻松栢
寤寐耿耿時當亢陽心禱躬省靈雨其霈千里普洽
仙寢改封月日暗合於昭在天陰隲潛周微誠詎格
慈德攸孚爰命相臣替奠洞酌禮缺拜掃心懸隧閣
暨夫信度近侍致酌錄嗣旌忠丹楔有煒曠禮畢修
先懿愈彰陟降孔邇庶顧茲觴

弘陵親祭文

思齊 聖后德合坤元四紀儷尊八域涵恩孝養
東朝慈覆青闈撫我髫齡藹如春暉餘慶垂後載錫
元良邦基永鞏 徽音彌長誕降歲逾百年奄屆禮
陟月回星駕夙戒緬憶含飴祇薦清醑於昭孔邇尙
庶感孚

元陵親祭文

於皇 聖祖大德純禧五紀建極功化隆熙小子寅
承儀刑曷逮載述載揚光垂永世餘慶不遲錫以篤
生邦命溥長襲于休禎歲仍豐成藏牒名山聲容采
遠羹墻莫攀履霜星駕祇掃 仙園洋洋儼臨庶顧

洞樽

元陵親祭文

穆穆 皇祖德配乾坤治成五紀化洽八垠積慶發
祥錫羨後昆 宗祏永鞏羹墻著存歲屆百齡禮展
三元月回虹渚露濕 仙園感時興慕夙駕星言衣
冠孔邇顧我洞樽

顯隆園親祭文

鬱彼花山天作吉岡灤水禮遷珠丘卜臧大德受報
基命溥將長發不遲錫我元良聖甲 慈晬應期協
祥邦本永鞏寶籙彌昌感深不洎休惟無疆禮宜告

玉藻集 卷二十三
慶誠切見墻新春夙駕躬薦豆觴原草再宿寢栢成
行音容莫逮時物增傷俯仰怵惕痛徹穹蒼洋洋孔
邇庶歆馨香

顯隆園親祭文

禮違春省節過秋禴慕增履霜感切攀栢 仙寢孔
邇躬薦泂酌洋洋降監優然如覲

顯隆園親祭文

新年孺慕夙駕祇謁冊儲禮定有懷明發恩隆錫羨
感增逢吉昭假孔邇永冀垂隲

仁元大妃大漸時 宗廟社稷祈禱祭文

宗廟

小子孤子仰賴 慈聖翼我覆我相依爲命承歡五
紀靡有疾憂向緣无妄旋獲乃瘳茲復愆和宿症添
篤湯餌罔功寸心如灼以身而代流涕以請陟降於
昭寧莫我聽精誠必通圭璧肅將冀垂冥祐式遄回
陽

社稷

於赫明神庇我宗國凡有憂虞必煩籲祝眇予小子
上奉 慈極五紀承歡偏蒙撫育向者違和靈隲是
獲今焉越添比前尤篤醫技旣殫心焉如灼靡社靡

耳溪集 卷二十三
稷誰因誰極牲幣雖薄衷誠庶格冀垂陰庥遄收勿藥

社稷祈穀大祭親祭文

國社

於皇太社冢土是主元氣磅礴以雲以雨澤我烝黎厥施孔溥首春祈穰肇禋自古庭有軒縣筵設簋簠宵升于壇犁星正午登彼萬寶錫以多稔昭明降監庶歆清醑

后土氏

維后司土至哉育物德配柔祇陰功旁達殖我東域

普垂靈隲夙祈康年載撰吉日農祥晨正已占臘雪絲管旣和牲醑孔潔馨香上升神權潛幹降以穰穰感茲芬苾

國稷

惟稷有神民食攸宗誕長百穀肇興三農屢維豐年綏我箕封秩祀冢社祈報虔恭瑞雪冬滋淑氣春濃歷吉躬禩圭幣肅雝辰星晰晰曉鼓夔夔冀錫大有慰此憧憧

后稷氏

思文邇后實虞農師夙降播穀萬世攸資尊爲田祖

民天是司自昔有年暘雨孔時元春祈歲肅將明粢
條風解甲土膏潤犁溝澮粼粼禾黍猗猗願垂靈貺
昭假不遲

祈雨祭文

三角山

岌嶢太華鎮我東維扶輿淑靈元氣淋漓膚寸攸舒
利澤孔溥胡屯厥膏惟月之午我麥未成我苗將枯
縱予不穀奈彼無辜爰舉彝典圭璧是將庶垂靈貺
大霈其滂

白岳山

崧高維嶽奠我靈基含飶胚精以潤以滋乃者維夏
陽愆其度淒兮以風邈矣其雨弱苗將萎高田已坼
嗟我三農秋將焉穫我誠如渴我醴孔潔油然一霈
惟神之隲

木覓山

維南有山維國攸瞻興雲作雨其澤普漸間者恒暘
彌月而亢麥未有秋苗又失養百畝龜坼萬姓魚喁
胡神弗惠若已有恫牲幣雖薄盼饗斯格亟賜甘澍
蘇我匝域

漢江

滔滔清漢維國之紀蒸爲雨雲品物攸遂惟茲亢旱
久屯厥膏旣損我麥又槁我苗民情如焚予心若湯
人其盡劉神將安享靡甘饌玉載舉沉璧庶運神化
亟沛甘渥

龍山江

清漢北匯震鱗攸宅噓成風雲護我邦國夏秋初交
膏澤不濡始期大有將阡極無四野龜坼萬口魚喁
蠲誠請命我心如烘夜瞻轟燁祁祁其雨若將傾盆
旋復焦釜汪汪滄波可挹可注何惜神權救此轍鮒

楮子島

有島融峙在水中央太一流精坎六包陽夙載祀典
久著靈貺萬寶幾成一暘愈亢何草不黃將野無青
嗷嗷衆望邈邈高聽仰瞻同雲俯視焦土始喜轟轟
忽驚杲杲責在司牧奈彼蒼生願借勺水夫答寸誠

東方東海

百谷有王最鉅于東龜龍攸藏江漢攸宗愍茲旱魃
彌月如烘禾黍卒瘁杼軸將空哀我黎元若已瘵惘
牲幣遍走盼蠻庶通荐雷方殷密雲旣同願賜一霈
俾占屢豐

南方嶽海瀆

維海嶽瀆為紀于南鼓潤萬物神功普覃旱胡太甚
年將大侵良疇既坼嘉穀如燂雲雷乍動膏澤無涵
赤子何辜涼德是慚萬口喁喁寸心悒悒亟垂冥隲
一霈之甘

西方嶽海瀆

金顛沆漭流峙于西功成萬寶澤洽羣黎三農過半
大有將躋唉彼旱魃焚山滌畦四野焦釜千耦轍犁
同雲有滄夕吹長淒何安饌玉靡懈秉珪願幹陰權
慰此望霓

中央嶽瀆

維嶽與瀆奠于中央養均萬品澤被四方節屆蓐收
挾月亢陽四野滌滌萬命皇皇有時霽霽終靳霈滂
惜彼胚胎無望收藏牲璧肅將玉食靡遑遄回陰權
活我黔蒼

北方嶽瀆

於維岳瀆正位于北天一攸生坎六其宅胡不惠我
一無斯極瘼我禾稼涸我溝洫烈炎杲杲惟日其棘
神將何依民之無食陰功素著靈隲靡忒油然沛然
粒我民國

東方山川

耳溪集 卷二十三
瞻彼震維奠茲山川生養萬物功利誕宣雨暘惟時
屢賜康年嗟今亢旱病我良田兆民將劉一心如煎
匪神曷愬寔予之愆敬薦精禋冀運神權靈貺不日
大雨方千

南方山川

朱明載宅有流有峙秩惟南訛鎮爲國紀嗟今亢陽
挾月逾熾無苗不焦我心如燬民寄涸轍大命近止
大夫遍走靡神不屈精誠雖薄仁愛孔邇挹彼勺水
救我赤子

西方山川

於赫金神精氣融結收藏歲功擎斂萬物粵自季夏
驕陽彌烈良苗將頽陰膏已竭八月焉穫百種無實
惟靈成物何德不卒自慚寡德仰祈陰騭亟回惠風
惟興之勃

中央木覓山

巖巖維山鎮國之离滋和穰災元氣淋漓嗟今一旱
良苗盡萎四野如焚萬姓齋咨神惟司民胡寧忍斯
非無潤塊終未盈犁疾聲仰呼救焚奚遲憫我元元
遑賜祁祁

北方山川

耳溪集 卷二十三
幽都有鎮惟神所舍鍾靈畜異消災降嘏唉此驕陽
粵自季夏有時轟燁終惜傾瀉苗旣無青野則如赭
節屆有秋望絕多稼瞻彼嘒星屢起中夜予雖弗惠
民豈忍捨

風雲雷雨

上絳燾物厥用惟四有鼓有震載行載施嗟今亢陽
挾月逾熾無苗不焦我心如燬忱誠雖薄仁愛孔邇
馨香上格雨方千里

國內山川

元氣融峙鎮我疆域唉此蘊隆四野如滌民旣無辜

神曷不顧于控于極疾聲以籲

城隍

鬱彼城隍衛我民社苗旣無膏野則如赭哀民何罪
寔予之責願垂冥隲洽此惠澤

勾芒氏

太皞有佐德主生發位正東方育我庶物節屆流火
邁此旱魃亟回油然良苗其勃

祝融氏

赫赫炎皇職司南維薰風養物甘霈孔時一旱太甚
萬姓其咨俯矜元元遄賜祁祁

后土氏

至哉神后厚德配天資成品物玄化誕宣烈烈亢陽
滌滌百川俯念蒼生過運陰權

蓐收氏

於皇白帝職主西成功遂萬寶澤洽羣生嗟今一暘
奄過三庚神其佑予一霈如傾

玄冥氏

維神司水爰宅坎北終始萬物貞固一德胡今亢陽
熯我稼穡過垂潤下惟日斯亟

后稷氏

思文田祖肇降嘉穀職司農三功著播百嗟今驕陽
逾月恒煥願垂靈貺錫以大熟

北郊別厲祭祭文

天地之氣厥有常度四運流行五德順布和則致祥
乖或致異有不循軌是以爲厲粵自姬周設壇弭灾
鄭歸伯有晉禳臺駘六氣有愆寒餓成疾害先煢寡
哀彼瘡札惟今之灾振古靡稽自西彌東肇臘跨歲
迅如疾風熾如烈火觸之者顛邁則無捨下自閭井
上及簪纓一二旬間朝市不盈胡神癘怒降此疾威
予實不穀咎將焉歸惠不下究德未上格有鬱不伸

有寃未滌投間乘虛爲眚爲孽上下神祇昭布森列
胡寧忍此薦彼荼毒其虛其徐救焚拯溺靜究厥由
非鬼惟人神兮至靈天兮至仁養人生人福謙禍淫
吉凶無門影響從心予主神人惡焉中悸我懷怵惕
尙亦靡屆仰籲默禱明發不寐非神曷控非靈曷訴
眇彼北郊生物攸始至敬無文禮舉掃地牲醴孔潔
月星昭朗肅然來思焄蒿惚恍揮斥氛翳返爾恒幹
人神不糅寰宇清晏融爲惠風載爲營魄遨遊四方
浩然自得助我元氣同我太平無誠不格尙冀聰聽

東西南厲壇慰祭祭文

王若曰嗚呼古先哲王代天撫辰覆育萬姓四序順
軌六氣調燮災沴不作生靈安樂顧予寡昧叨受有
衆德不足以孚協天心化不足以導達和氣民志不
寧仁天示警往歲饑荒之災將致蕩析之憂迺於去
臘之末忽起無名之疾始自西塞延及海甸旬日之
間遂熾于京城覃及於諸路急於燎原之火如在沸
鼎之中呻吟達於郊原瘡痍遍於街巷嗟我黎庶亦
孔之哀矧伊冠紳並受其災人情遑遑莫保朝夕此
何時變在古未聞丙枕靡寧中夜繞壁靜言思惟豈
可諉之天數實惟咎在人牧爲民父母痛徹心腑反

耳溪集 卷二十三
躬自省靡所控訴予爲神人之主不能變理陰陽災孽肆行以致生民遘禍無辜橫罹慚愧悚慄尙復何言惟當恐懼修省聚精會神發政施仁惠鮮孤寡使死者無憾生者得所將以示哀矜之意洩幽鬱之氣爰命掌土之臣遍察暴露之類或具掩體之衣或賜穿土之資俾殘骸有歸羈魂有托而謹稽周官之典亟舉泰厲之祀先告城隍之神咸秩無祀之鬼卜日遣官具酒與牲積誠致虔敷心宣慰惟爾羣神無遠無邇來享飲食共飽均霑庶幾怨氣潛消於冥漠溥澤徧逮於幽陰永絕煩冤之聲咸知字恤之心災患

從此熄滅衆生於是奠安矣故茲教示想宜知悉

鷓述嶺祈雨文

在慶州時

屹彼南嶽上摩天極靈虬所蟠神母攸托噓而祥雲噴有驚雷不動而運功利博哉乃者驕陽彌月愈亢玄冥失權赤魃干命麥收空場苗寄焦土焉得勺水救此轍鮒有菑罔卹食土者羞吏躬不惰來神與謀牽牲載幣陟彼天半衆民雲從僵仆喘汗宵升于壇上捫列星左箕右畢肅然風冷頰視滄溟洪濤汪若蒸成膚寸去灑盈尺濛鴻業哉恍惚畢來匪誠之格惟民之哀

利見臺祈雨文

新羅文武王時倭奴屢侵民國不堪王臨薨謂羣臣曰吾死葬于海中當化為龍以扞倭船嗣君不敢違遂納柩於石嶼中已而黃龍見於其上乃望祭於海岸名之曰利見臺

維天池兮有四惟東海兮最鉅日月之所出息兮百川之所歸貯興雲雨以澤物兮杳變化其無倪昔文武之神聖兮大啓宇於徐羅乘六龍而御天兮統三韓而為家憤島夷之侵疆兮哀生民之罹殃輕千乘而蟬蛻兮托水國而揚靈遂令海若安波兮鯨鯢伏匿兮鮫鱈遁藏民至于今懷德兮飲食必祭兮災患必祝形既化兮神以靈護茲邦兮千億胡今一旱兮

自春徂夏山焦而澤竭兮天地如爐兮雲似火何苗不黃兮何田不坼農夫輟鋤兮蠶女罷織憫憫兮望霓憂心兮如焚如焚兮奈何叫天兮莫聞伊水旱必有所召兮非氣數之適然彼赤子兮何辜寔司牧之匪人羣望兮遍走圭璧兮既卒竟漠漠而無應兮蹇誰因而誰極惟先王之至仁兮又神變之無方乘雲上下于玄間兮時眷顧乎故邦草綠兮金鷄之林煙生兮白馬之井月城之故基不移兮五陵之佳氣無恙山川宛其依舊兮遺澤流其未喪覽周餘將靡孑遺兮寧不戚然而潛疚速屏翳使噓雲兮詔河伯以

先路傾滄波之萬頃兮灑鰲山之高岑如涸轍之待
蘇兮投一勺以千金推神權於衛國兮答輿望於沒
世陟利見之崇臺兮望鼎湖之遺址旅玄篚於海岸
兮沉繭粟於水宮椒糈兮醴香精皎皎兮上升霓旌
兮芝蓋來以風兮去以雨瀆鬼兮川恠續紛惚恍以
備御靈剡剡兮旣降燈燭光兮夜未央天荒荒兮海
雲起水擊波兮雷轟轟

兄江祈雨文

江之大兮百川之兄兮江之深兮衆瀆之停兮江之
氣兮蒸爲雲而噴爲雨兮江之流兮枯者潤而萌者

乳兮孰主張是兮河伯之神歟震鱗之長歟居東海
之上游兮載前代之秩望凡有災而必禳兮有籲而
必應何今日之苦旱兮匝春夏而愈虐川溝斷絕兮
原野蕭索無麥不可以及秋兮無禾又何以卒歲環
田畝而號呼兮奈此億萬之生齒寔司牧之匪人兮
何辜乎彼赤子不忍立視其死兮徧走乎山川旅幣
於神母之嶺兮沉牲於大王之淵初鬻鬻而乍集兮
或霹靂而旋屯如有鬱而未洩兮若將救而猶慳旣
理窮而勢急兮遂往訴乎江之神江之神兮神以靈
茫洋遊乎玄之間呼吸兮變化左屏翳兮右玄冥居

耳溪集 卷二十三
是邦兮食茲土神不顧兮誰予聽決萬頃之洪濤兮
化一陣之甘露鰲之山兮蛟之水不崇朝而遍灑噓
弱苗於旣枯兮活萬命於將殄惟神之賜兮何以報
之有明禋斟酒兮江之波血牲兮江之涘吾請與神
約兮以三日而爲期不能興雲而致雨兮謂神不靈
而不仁將驅鉅萬之衆兮掃一境之民舉鍾兮如雲
捧土兮如屋塞江之喉兮斷江之腹激過頽之湍兮
救涸轍之鮒于斯時也波臣奔走兮魚服暴露神於
是乎失所兮雖噬臍而何補敷心曲而致辭兮滂江
瀆而低徊雲溶溶兮水曾波神恍惚兮風來

大角干墓祈雨文

河嶽之靈鍾爲英傑粵羅中興有若舒發登山誓天
星斗下拂斬石試劒蒼崖爲裂剪驪削濟三韓爲一
安民闢國萬世蒙烈身騎箕尾光爭日月家尸戶祝
以芬以苾神兵夜奮寶笛波謐弭災救患民國以活
嗟今之歲罹此旱魃四野如焚百川斷絕我麥旣病
我苗又闕萬命嗷嗷如寄涸轍乘山走海圭幣旣卒
或灑旋屯或鬱不洩若遲數日民將盡滅西兄之陽
有丘斯屹衣烏是藏精光上徹睠焉舊邦寧不傷怛
姓傳來雲名誦走卒蚊川故宅喬樹弗伐哀彼遺黎

匪神誰卹陽靈陰示昭布森列呵辟虐沴神權是幹
約束玄冥鞭驅列缺翦然春噓沛若河決一瀉千里
其興也勃神之德矣如肉旣骨民之劉矣神其不血
我酒旣清我牲孔潔於赫明靈曷不我察

兄江再禱文

伏以凡物之在天地間者皆有職而有守上自五行
之佐四時之吏下至服乘之材鳴吠之技莫不各分
厥職而效其能有曠廢而不虔厥罪罔赦夫惟龍之
爲神也其德陽其用天其職風雲雷雨其守江海匯
澤呼吸則萬物被其鼓潤變化則天下蒙其利澤所

以爲鱗介之君居四靈之首故有水旱之災必於焉
而是禱曩者一旱農人告病太守躬來兄江之上以
三日爲期爲萬民請命視牲之夕雲從西北起江流
有聲其風瀏瀏鷄鳴卽事升壇奠幣爐煙嫋娜燈燭
光瑩始則霏微倏焉滂沱通宵不輟崇朝乃止越十
日復大雨旣溥旣優民乃大悅皆曰惟神之賜自是
厥後旱又彌月百穀用不成黎民將盡滅噫嘻此豈
天地之心哉必有邪沴之干其間而莫之禁也惟神
受職于是邦食于茲土不能興雲而致雨救患而恤
灾是隳厥職也失其守也夫受天之命而喪其職守

是不共也食其土而不能救災患是不仁也不共不仁謂之不靈則是常鱗凡介之匹耳何足以據水族之長而食三公之秩乎夫服乘賤畜也鳴吠微物也尙能奏厥職而莫之敢墜况以四靈之尊爲天用之神者乎竊爲神耻之太守受朝廷命爲神人主誠不足以感天力不能以救民是亦隳厥職也喪厥守也何暇乎尤神然猶能跋履山川凌犯風露躬十餘禱而不知止則其心猶在乎民也若神者恬然漠然終不見運動有若越人之視秦瘠也或者默運其權而人莫之測耶抑將有所待而時未之及耶默運而無

其跡是猶不運也有待而不及乎時是無益也二者奚可焉吾請復與神約一晝一夜終不能致大雨救一邦之命則當夷神之墳廢神之祀塞神之門戶涸神之堂奧見鱗甲之暴露將受制於螻蟻豈不危哉豈不哀哉予言非妄神其圖之

社壇祈雨文

伏以天地設位山川區分立之神立之牧凡所以爲民也故社以司土以居民稷以司穀以粒民守宰以分地以牧民三者不可缺一而民之有不獲其責均矣惟此東都地方數百里人衆大萬蓋公侯之大國

實羅氏之故疆也則其社稷乃古之國社國稷非列郡縣之比其職之重與其神之靈又非嶽祇瀆鬼之儔匹也故自羅氏亡至今千有餘年人民繁殖年穀豐盛鬱然爲大都會者皆神之力也夫何去歲之旱一境大饑賴朝廷發粟賑貸民仰哺於官者萬餘口及麥而止今夏又大旱麥遂不成苗之枯者半若使數日不雨其半又枯矣噫嘻其將盡殺斯民而後已耶天地之德在生物鬼神之功在養民此豈天地鬼神之心哉殆守土者之匪其人不共不享有以召之也夫爲人牧而不職其職惟災之召則厥罪無所逃

何敢抗顏而求助於神乎然無辜者民也可哀者民也神之不卹則非天所以居民粒民之意也噫土穀者本以爲民也無民則神亦失其所爲司矣非獨守土者之憂也守土者方自憂之不暇而乃反憂神之憂蓋所憂者均是民之憂也神其憐之察之

崇德殿祈雨文

伏以天降聖君肇開東土世傳千祀奄有三韓凡厥林林總總之民咸有生生化化之澤至若鷄林一域實是龍飛故墟西鳶山邊尙留仙桃之蹟白馬井上爭傳大瓠之祥四時之芬苾罔愆昭代盡崇德之義

五陵之松柏無恙遺氓寓沒世之思乃者加王號而建豐碑所以致殊禮而修闕典豈惟報本之道於斯爲隆尤驗入人者深愈久不替夫何今歲亢陽之烈乃在去年大饑之餘三春之煦哺斯勤可憐菜色之未除彌月之赫炎愈甚奄致麥農之告瘁暨茲插秧之辰又見暵菴之歎譬如大病之甫起一縷凜然若使今秋之荐荒萬命近止嗟羣情之轉急匪我后而誰控忽臨睨夫故都寧無惻焉之感將往愬乎上帝庶幾油然而興當卜日而戒牲已占霖霖之澤想如水之在地佇看滂沱之流嗚呼詩云前王於乎敢忘

頂踵之德魂兮東方托些倘聞疾痛之呼

角干墓再禱文

去歲嶺外旱東都遂大饑朝廷發廩賑之民以活者萬計今年又大旱無麥苗盡槁民遑遑將四之太守躬禱于山川社稷暨新羅始祖廟終不雨邑人曰盍請諸角干金先生之墓乃卜日致戒或曰自古名臣賢輔之弘濟斯民者不過止於其身而已其稱功流後世者特指遺風餘烈而言耳惟我角干先生功非不盛澤非不洪而其身歿其骨朽今已數千年所何能興雲致雨救此生民耶言之者殆過也太守曰不

王溪集 卷二十三
然凡大賢之生必得天地之間氣不以生而存不以死而滅故唐之韓文公居潮一年而歸潮人廟而享之有禱則應夫先生之功蓋三韓不啻韓之於潮而東都乃先生父母之邦也先王之陵寢祖宗之墳墓皆在今之民非先生之雲孫餘苗則乃先王之遺黎也又非潮民之比也先生而有知則寧不憫然而拯之耶噫先生以間世之傑負濟世之畧忠貫白日勇冠三軍統合驅濟功被萬世蓋自東方有國以來一人而已其精神靈爽能使寶劍自躍神兵夜奮則何難叱咤風雲旋斡氣化救一方將死之命耶吾所以

求助於先生非惑也客曰唯唯善哉禱乎其得雨也夫遂爲之辭曰

英英者氣兮燁燁者靈或下而河嶽兮或上而列星昔三韓之瓜分兮民血腥于鋒刃上帝惻然降監兮命我公而整頓授神劍而一揮兮削驅濟而底平功成兮不居遂飄然而上征留衣鳥於故都兮松栢鬱蒼兮鳥獸悲嗥設俎豆于西兄兮王官備物兮縫掖拜跪至今千有餘祀兮敬恭兮勿替夫何旱魃之肆行兮去年今歲兮椽我遺黎謂天地之可干兮謂神明之敢侮靈煌煌兮頰下何不赫然救我靈之劍兮

王溪集 卷二十三
如霜靈之怒兮如電驅除妖孽兮排決雲漢靈之來
兮百神護玄冥在後兮列缺在前蒼蒼兮斷石之峰
茫茫兮萬波之淵蛟川有魚兮輪井有水靈所嗜兮
胡弗卹旱魃兮何不早去生民兮終不盡滅

敬順王廟宇改建影幘移摹後奉安祭文

鬱彼鷄林羅氏肇興三姓迭王千歲相承惟金最盛
奄有驪濟曆服既久邦運終替王遭多難識命全民
跡似宋錢禮隆虞賓傳世將相毓慶宮壺福履莘莘
源深流遠立祠故都恪修明禋有儼真像大慰邦人
地齧于浸廉桷不尊守臣上聞謀及遺孫爰卜善地

圭直砥平南眺仙桃東瞻月城秋清日良載遷載安
地近崇德秩比金官日角如新廟貌增肅神其永綏
庇民降福

南原龍章書院合享祭文

三江先生 高麗功臣
梁朱雲

山河間氣文武大畧徵祥錫名折檻遺直讜言正學
一代矜式海寇稱亂據我南服人心震蕩國步崩析
執綫貳君乞靈隣國哭徹秦庭義感殊俗援師東出
僞會授馘危邦再奠功齊上洛錫茅龍城帶方是食
煌煌鐵券名高上壁明農謹教百歲流澤龍章故祠

邦人報德後孫繩烈倡義樹績多士叫閭躋配翼翼
禮舉芬苾事光簡策

青溪先生

壬辰義兵
將梁大樸

地靈鍾傑秀出南方九世忠孝八代文章請斬蠻使
大義焯然蛇豕荐食十載幾先灑血登壇壯士雲從
一檄三南義旅前鋒曰高曰趙推我尸盟雲巖大蹂
屹為長城天步西窘擊劔仰誓宗澤大呼睢陽為厲
櫪馬嘶夜陣虹貫月天使奮筆比漢諸葛丹楔焯煌
超秩貳卿一邦瞻聳永樹風聲士林齊辭先祠是祔
一堂祖孫百世俎豆

左議政信度公慎守勤墓致祭文

惟卿娥林鍾靈觀津華族克誕 聖女正位坤極遭
時不幸邦運中阨地均肺腑義同休戚舉足左右禍
福倉卒專心所事毅然靡奪日月重光乾坤配德臣
民咸戴翟芾有懃勲臣逞私天常敢逾糟糠之教讀
者掩抑瑤華寂寞 園寢禮缺忠言屢發正論久鬱
明陵遺志 寧考是述廟貌有儼神人胥悅懿卿特
立獨全娉節歲甲重回予懷增憾遙瞻 溫陵敬薦
洞酌既錄嗣孫又侈丹綽國舅旌忠禮實曠昔近臣
替酌靈其歆格

延安南大池疏濬告由文

靈之居兮碧湫清湖靈之遊兮白蘋青蒲荷衣兮蕙帶風爲車兮雲爲蓋花之朝兮月之夜連蜷天矯乎上下鷗鷺爲賓兮魚鼈爲臣粳稻爲糈兮菱芡爲糧涵潤一方兮伯仲錢塘何日月之浸遠兮泥沙填闕兮陂岸崩覆萑葦滿目兮牛羊來牧神不安其宅兮咎實在於守土九重咨嗟兮按圖之故命岳牧使往度兮董列郡而趨事節旄翩翩兮印綬纍纍畫地課功兮分瓜裂幅萬鋪齊作兮爰築爰鑿卜日致戒兮穆將愉兮明神灌酒乎清波兮沉牲于深淵民之願

兮神必從王有命兮神敢違呵風叱雨兮屏除青菑隄廢兮神之羞功成兮神之休神洋洋兮顧我千秋萬歲兮以安以敖

耳溪集卷二十三 終

耳溪集卷二十四目

祭文

祭鄭叔幼能 克儉 文

祭季舅沈公 敏 文

祭內從沈兄 靖之 文

祭伯舅樗村沈先生 鏞 文

哭亡弟進士挺漢文

祭再從叔同敦寧公 鑑輔 文

哭亡女李氏婦文

祭金仁川 亨大 文

哭長子婦坡平尹氏文

祭族弟憲漢文

祭鄭平壤錫保文

祭李善山章祐文

哭仲弟進士遷葬文

哭亡姪女趙氏婦文

哭亡兒文

祭亡兒初碁文

祭鄭叅判晚淳文

哭亡室貞敬夫人文

祭宗姪領議政孝安公樂性文

祭族叔奉朝賀秀輔文

哀辭

尹叅判東昇哀辭

耳溪集卷二十四

祭文

祭鄭叔幼能 克儉文

生吾同年長吾同里親吾同堂學吾同志周旋追逐
 二十八載知子之熟宜莫我如哭子而哀非我誰歟
 子在髫年聰穎絕倫學語未幾日誦千言作為文辭
 開口驚人亦工于書道妙可珍余顛而駭邈難攀援
 如駑躡驥喙汗僵顛十齡以後並罹愍凶艱難成立
 悲苦畧同粵歲庚申子年十七忽來呼余往觀皆骨
 余謝不能子笑余俗一馬單僮飄然出郭東臨滄海

祭文

耳溪集 卷二十四
日月所浴深湫九折神物攸伏銅柱架空鐵繩懸度
萬二千峰三旬遍睹携來錦囊有詩百篇戊辰維夏
伯氏北遷間關就省炎雨沒韉鐵嶺峩峩雲樹連天
山河豐沛謠俗華夷感物寄興一發諸詩弟唱兄酬
風雅鼓吹子之初歸余亦東遊金沙玩月亭淵泛舟
蒼玉之屏白鷺之洲有題有咏極意冥搜金子渾然
亦吾詩儔壯遊東南歸自丹丘寒冬積雪微月入軒
徘徊中夜有懷伊人剝啄者誰而來踵門二子同携
聯翩筇屐袖中新詩各自盈軸呼燭乍展矍然以駭
光恠滿目若睨珠貝亦示余作往往見採酌酒微醺

高吟朗誦一唱三歎令我神聳席前分韻三疊聯章
通宵佚宕酣嬉激昂余少失學詩則尤鄙子不我棄
而或過許余評子詩嫩花纖月高華媚麗清新警絕
或失之靡其弊也俗蹈矩挈繩步武是拓子論吾詩
玄酒朱絃韻高才疎氣逸聲偏尚矣古風非今所賢
文與質班乃彬彬然子意我喻我言子可慨然發憤
思振大雅如構廣廈我斤子獲如馳大陸我驂子轂
有不相須厥功用跌兩志交勵十年一日子性疎曠
余拘而拙子才英妙予鈍而質趣實鑿柄契乃膠漆
蓋有攸同非人所悉泊然相對不翳毫髮神融意真

物莫能奪子喜飲酒澆盪壹鬱三杯以往意氣橫溢
眼空一代蟻視俗物談謔風生四座傾屈隨衆業科
意所不屑一捷兩塲乍騫終蹶才高命嗇奇疾是遭
庸豎妄割有鍼如刀謀之不臧命也非正死生脩短
孰司其柄余時郊居三入視疾逢別倏忽執手長訣
顏貌已變神守不亂整理後事綽有條貫卅字大書
以鳴不平詞氣悲壯筆畫如常天寒仲冬風雪蕭瑟
窮陰震剝蘭摧桂折頽如其長婉兮其美遽然長往
悠悠我思鶴髮雙涕青發晝哭天猶可必有寄在腹
湍山之足言歸其骨余有南行哭未臨穴一觴告哀

淚隨聲滴寧子有聞寫我衷臆

祭季舅沈公敏文

嗚呼天下之達道五而友居一焉若是乎友道之大
也然彼四倫者未有不須乎友而盡其道則譬如五
行之土貫四氣而無乎不在也友之爲倫於人亦重
且切矣夫如是故古之君子汲汲乎友之求焉有不
挾者三忘其形而懼失之易也有益者三擇之精而
不求備於一人也有久而敬之道焉有數斯䟽之戒
焉凡所以全其交也詩詠伐木易稱麗澤求之不獲
則乃尙友乎古人求之也如彼其急而得之也若此

其難也蓋將使居而輔其仁行而導其善過則糾其失疑則辨其惑憂樂與共出處與俱死生不相棄背夫然後稱之曰友爾此豈顏面相追逐氣義相然諾世俗所謂知舊云乎哉小子於公以舅甥之親托朋友之契者蓋三十年矣求之也不遠得之也非挾乎親益不止於三則求未嘗不備也數不至於疏則非苟以全交也心乎愛而志相得庶幾古之友道而結髮相從白首爲期忽中途而棄我矣自公之沒子子偃偃居無與爲隣行無與爲羣過而無人乎規疑而無人乎質憂而無與共其憂樂而無與同其樂况於

出處之重死生之際誰與俱而誰之托耶嗚呼痛哉脩短數也死生命也或先或後同歸於盡則逝者無所恨而存者信可悲也凡今之世余之交人多矣若求其一善一長爲我益者之友豈無其人而至於責之以古所謂友道則蓋未敢輕許焉謂無其人則幾於誣謂有其人則近於愚豈真無人耶其真不知人耶此殆我無足取而人之拒我也然則小子之哭公非止哭公之亡也自哭其不幸也非止哭其不幸也哭友道之將亡也嗚呼痛哉日月云邁喪期將畢追惟往昔萬事悲涼使逝者而有知則從遊九原之下

復續斯世之樂安知其不以悲而以慰也如其無知夫復何云嗚呼痛哉

祭內從沈兄 靖之文

嗚呼人固以窮達爲榮悴得失爲欣戚而斯乃世俗之常情非論之篤也惟公年逾不惑而身不免於韋布學貫經史而才未試於當世則亦可謂窮且厄矣然而生於夫子之家長乎詩禮之訓處四方摳衣之地爲古人舞綵之戲凡其在世四十二年之間罔非起居乎俎豆絃歌之場薰沐乎春風慶雲之澤則此蓋聖人之無憂君子之一樂也其視世俗所稱窮達

而榮悴者未知孰得而孰失也公又何憾焉小子於公親則中表情則骨肉幼而鞠於公家長而教於公家猶幸及見公家全盛之日入陪杖屨同承過庭之誨退講文史猥沾麗澤之益吹塤鼓瑟之和不足喻其樂浴沂舞雩之興油然而有所得而若夫孝友忠朴之風深沉博雅之文疎曠伉直之氣未嘗不厭然而心服也一室之內和氣融穆百年之間福慶鼎集豈惟一世之所歎慕抑亦古今之所罕覲而云胡數年之頃禍故層疊賢者抱羸博之憾斯文遭樑摧之痛追惟曩日之樂倏然薰歇而響絕此真所謂理不可

推而神不可測者則後死之悲寧有窮極耶一觴告
哀萬事寥廓九原有知能不掩抑嗚呼哀哉

祭伯舅樛村沈先生 銘文

嗚呼道之在天下未嘗一日亡也然非學而明之身
以由之則道於是離于人而人不得傳斯道矣經曰
苟不至德至道不凝焉德者行道而得於心之謂也
自夫朱夫子倡明斯道世之學者莫不以致知窮理
反躬實踐爲相傳之家法然專講說者或少體行之
實主踐履者常忽著察之妙此乃世儒之通患而道
之所以不明不傳也先生以剛毅淵粹之姿盡高明

密察之功擇之精而行之篤積之久而養之深年彌
高而德彌邵可謂實有諸已而得於心者矣小子之
事先生蓋三十年所矣學諛識淺顧何足以窺測門
墻之高宗廟百官之美而竊嘗於操杖屨承辟咷之
間亦有一二所聞焉先生之恒言曰道備於庸學首
章學者求道舍是則罔可若其求之之方朱子言之
詳矣因舉集註道之本原出於天而不可易實體備
於已而不可離學者於此反求諸身而自得之數句
以告人曰吾儒之學盡於是矣且曰聖人本天釋氏
本心凡王陸之學皆本心也本天之學必先窮理大

學之格致中庸之明善皆是物也此乃先生爲學之本領教人之大綱而若夫日用彝倫之間動靜語默之際有物有則各盡其分則此又先生德盛行備周旋中禮處而人人之所得見也至於靜中之動動中之靜敬義夾持表裏交養方寸涵太極之體左右逢鳶魚之妙則惟先生樂其所樂而非他人之所能與知也試就其著於外者觀之則和順積中英華發外睟於面而盎於背望之儼而卽之溫威可畏而儀可象者此乃古人所稱聖賢德容之盛而今於先生見之矣知德者希孰識其貴而小子雖不肖亦不敢懷

阿好之心而作溢美之辭以自陷於誣長者之罪也嗚呼先生之喪 至尊親誅此乃國朝儒賢所未嘗得者實唯斯文之光而非一家之榮也于時小子適叨近班仰瞻 玉色有憾哀綸惻愴若曰忠厚純實如斯人者今不可復見仍詢賤臣以疾病之所祟年歲之幾何下及遺孤特命收錄先後恩言至三至五可感幽明此可見先生實心實德蓋嘗受深知於明主而禮遇不替於始終哀榮備至於存沒嗚呼此豈聲音笑貌之所可致也哉至若四方學者雖未嘗及門者聞喪之日漬緇緘辭奔走來哭者厘百數或

有繭足千里跋履霜雪而不憚勞者山頽梁折人所共悲而盛德之感人於此亦可驗矣存而矜式一代沒而師表百世生榮死哀浩然乘化先生可謂無憾矣而小子竊獨有區區私恫焉先生之於小子親則舅甥義兼父師凡所以開導而責勉之者至誠懇切而惟小子顛蒙庸懦迄未有尺寸之得加以蚤孤當室東西轉徙攻時文覓科舉弱冠以後遂不能久侍左右專受一經竊以先生春秋猶未篤老精力亦且康強獲遂素願不患無日乃於年前倖竊科第既捨舉業兩弟稍長可以託付家事早晚將乞不肖之身

負笈數年卒承嘉誨上以爲藉手事君之資下以爲立身行己之方矣去年秋爲省大母于商山歷候先生於樛村是時先生寢疾經年而神觀無損於前誨勉諄諄俾於歸路更來踰嶺未幾忽有史局除命承召赴京師路過竹山相望一舍留書告行而去豈意是日先生遽棄後學書未及啓封而遂成千古之訣嗚呼痛哉此實小子沒身之恨而自哭其不幸者也唯與一二同志交相策勵收拾遺文以示來世謹守法門以淑其身庶不負平日教育之恩而若涉長途竟迷指南如營大廈遽失矩繩悠悠蒼天曷其有濟

嗚呼哀哉

哭亡弟進士挺漢文

嗚呼吾何忍操筆以作哭汝之文耶亦何忍無一語送汝之行也嗚呼痛哉人孰無兄弟而豈有如吾與汝者乎人孰無同氣之憾而豈有如吾之可悲者乎世之天枉者何限而亦安有如汝之可惜者乎嗚呼痛哉念昔癸丑喪吾先妣余年十歲汝年纔三及至丙辰先考捐背余年十三汝年纔六吾則稍有知覺尙能持衰哭泣而汝則方在乳下遂不記父母之面矣論其情理之絕悲汝又甚於吾矣嗚呼痛哉兩箇

兄弟俱在童孩數年之間並失怙恃人生之可悲孰有如吾兄弟者而零丁孤苦轉徙京鄉食淡攻苦相與劬學賴天之靈艱難成立旣冠旣媿產子育女吾旣忝竊科第汝亦妙年登庠親戚知舊舉皆嘉悅以爲吾先人不食之報始發於吾輩而祖先緒業庶幾不墜於地况汝器宇俊邁文藝夙就磊磊昂昂有遠大之志人之視之也猶鸞鷲焉騏驥焉使之需於世也將瑚璉也棟梁也此非獨一家之言卽舉世之言也其期待而倚仗也非獨爲門戶之光抑亦負世道之望也豈意年未滿三十無一成就忽焉止於斯耶

嗚呼痛哉歿壽之理昔人所昧才而無命賢而無祿者從古皆然則吾何獨疑於其間而大抵才出於氣器屬於質才高者未必器宏氣清者未必質厚此所以才高氣清者往往不得其壽也如汝者才高而器宏氣清而質厚天之賦與如是偏厚宜其受遐遠之福而今忽天之椽之惟恐少留於斯世此何理也古所謂神者難明而理者難詰者非耶所謂司命者果有主張耶抑冥然漠然都不相干耶嗚呼痛哉吾於去年乞養求郡及週歲而始得一麾與汝奉親西下期以上奉甘旨之供下遂具爾之樂而阿麟在京

應舉使之孳家衆以來矣到官僅十餘日余差永清試官相去不過一宿留汝侍親而行別來五日忽聞汝病劇之報謂以一時感傷不至深慮急報踵至謂無可爲而恟恍驚疑默禱于心妄意天可必而理可信也試役未畢不可徑行忙忙竣事冒夜馳歸道聞凶音蓋於得病之日已不可救矣嗚呼痛哉天乎天乎胡寧忍斯兄弟孤露相依爲命千里關外忽然天折病未及視歿未及訣窮天極地此恨難盡夫以汝宏遠之質純潔之行和平之性仁厚之德思之又思決無窮天之理此殆吾積殃在身賦命奇薄天降酷

罰不使保有賢弟矣使我卽地溘然少延汝命則吾實安之樂之無復餘恨矣今乃不加之吾身而移于汝使余抱此沒身之痛無涯之憾天實爲之謂之何哉余於前冬奉命南下聞汝得丈夫兒喜而不寐及春而歸途聞失兒之報心焉慘傷相握淚下豈意于今汝又至斯終不遺一子於身後天之毒汝胡至此極嗚呼痛哉從今以往吾無斯世之念矣汝女今方六歲養育以待長成吾有一子他日幸又生男則當使奉汝之祀阿麟姑未生育後若得兩子則亦當分其一而門戶衰薄一至於此未知天意果何如也汶

上新阡有一餘穴卽吾爲後日計者而今將葬汝于是矣日家有忌姑先權卜于某地俟吉年終當葬汝於先人之足矣嗚呼汝於日者夢見于余以汝平日草藁若有所托豈汝冥冥之中自悼其無所表見欲托此而不朽耶哀哉吾將收召精魂點檢遺篋有可以不沒者則當附編于王考遺集以遂汝志矣嗚呼後死之責止此而已顧何益於長逝者耶哀哉痛哉迢迢關河生行死歸行路之人猶當掩泣此恨此痛何地可洩蘭摧玉碎昔人所悲秀眉豐頰于何復覩茫茫千古從此訣矣汝其聞耶不聞耶悲耶不悲耶

耳溪集 卷二十四
鳴呼痛哉

祭再從叔同敦寧公

鑑輔文

鳴呼小子不天夙罹險釁惇然孤苦宗祀如綫公來
撫我若父詔子責以勸學罔墜先緒亦幹我家靡小
與大艱難成立繄公是賴往歲庚辰我借南麾公在
湖州違隔三朞公先解綬築室上游我亦西還去年
之秋取路撻川疋馬馳造公病在床執手迎笑黃梁
白魚野味相勞欸欸夜語燭殘鷄呼公謂我言余今
老矣塵埃絏冕於我斃屣江山花竹聊以永矢汝能
從我及茲未衰來營一丘暮境相依余拜公言中心

是佩高風炯訓時發夢寐辭歸洛下曾未半載公不
少俟遽隔千古此生今世瞻仰靡所公昔植杖樂彼
東園卜兆茲岡事若有因期薄卽遠計違憑哭非敢
負德有愧懷祿隻鷄短詞倩人設酌臨風長嗥有淚
汪若嗚呼哀哉

哭亡女李氏婦文

嗚呼爾之父母舉爾今纔二十一寒暑矣未嘗一日
離吾膝下余或有數月之行爾輒牽衣含涕問余歸
期今忽捨余而長逝漠然若相忘嗚呼此何理也汝
之爲人端潔祥順聰慧頗識道理每恨不得爲男子

王溪集 卷二十四
余常奇其言而惜其志爲之擇佳婿入高門庶幾宜其室家享有福祿豈意結褵僅六載未有子女而遽然作窮夭之人嗚呼此何理也汝少無疾病未嘗貽父母憂去年秋忽有腹病厭食之症醫言似孕候不宜輕用藥物余亦昏不省覺轉至數月病痼而體羸始付醫治或謂之癖積或謂之蛔氣終未得路徑首尾五六月浸浸然如水之焦嗚呼爲父不慈不能早求良醫而活汝行負神明禍及於汝年逾四十而無一長成之兒只自悼矣尙誰咎哉始汝喪時汝舅泣謂余日子則有他子女吾只有一男一婦托以後事

今失此賢婦門戶亡矣棺殮之後當就吾家而殯焉余念父母之愛一也旣哭於斯宜殯於斯奠於斯待葬後返哭於舅家合於情而不悖於禮再三請而留之一飯一饌皆出於汝母之手汝父雖不能朝夕執奠以時撫棺長嗥如見汝在汝於冥冥之中庶有所憑依耶嗚呼悲夫念汝病時不憂汝病而憂余之憂其病輒曰今夜善睡矣今朝善食矣務以寬余心今汝有知其憂余之心有甚於前日矣余故抑情制哀安寢與食所以慰汝之魂而其頑且忍則甚矣嗚呼脩短天也天壽命也自古賢而貴而夭者無限則何

王溪集 卷二十四
獨於汝而悲之然幼而哭老少而哭長理之順也以
老哭幼以長哭少理之反也余安得不悲然順亦命
也反亦命也歸之於命者爲其無可奈何也知其無
可奈何而哭之不止者發於情者亦無可奈何耶近
余曾膈之間若有物焉結轆輪困哭則氣洩而少舒
不哭則氣逾而愈不平是亦無可奈何已嗚呼哀哉
嗚呼痛哉

祭金仁川

亨大文

嗚呼我生不天早失怙恃兄弟鮮少孤苦無比子年
十四委贄吾門情托骨肉樂同箎塤子性高潔瓊樹

倚空子才超邁駿蹄追風使之需世靡適不宜屈就
蔭塗匪乃攸期妙年理劇案無停牘窮交就哺門不
滯屨粵歲之庚余尹東京子佩南綬宿春相望鰲山
雄詭鶴湖清曠君來我往絲管佚宕我先西歸分手
嶺頭子移畿郡我出湖州一別三年參商睽隔有書
無面寤寐寄憶維乙之秋聞子邁瘡壯歲一疾宜遄
勿藥臘月初四夜夢見子沉吟在床言貌憔悴惘然
神驚戚然心悸朝未及旭凶音來至失聲長嗥心肝
隕裂生而久別夢乃長訣嗟嗟季長而竟止斯命耶
理耶不可究思子之豈弟中途天椽吾妹仁厚盛年

畫哭鶴髮雙涕鵠原隻影三箇孤孩髮髦煢煢逝者
有知寧不飲恨子之云亡知舊相唁謂善無祿謂天
可疑自古皆然抑獨何悲其後必昌執契以俟教育
成立責在後死日月有期筵幄將撤聲容漸遠萬事
已訖瀝觴一慟言不盡懷靈其有聞鑑余之哀嗚呼
哀哉

哭長子婦坡平尹氏文

子婦尹氏之喪將以來十一月乙酉朔朝引向東郊
權窆于牛丘先塋之側前四日辛巳舅忍綴數行之
文哭訣于靈筵曰嗚呼汝之爲吾婦今僅十一月矣

于歸而在舅姑側前後僅十數日矣汝今棄舅姑而
何往耶謂之真也則理之所不當有情之所不可忍
謂之夢也則冥然而無所知漠然而不復覺矣嗚呼
痛哉人生百年比之一夢如汝之生不過中殤可謂
夢之最短者而以吾婦言之則又夢中之夢也是何
造物者之戲劇至此耶悲夫悲夫吾與汝大人爲童
穉交及歲癸酉余得丈夫兒是歲汝亦生提孩之時
已有結親意而十數年來兩家子女俱長成且以通
家故熟聞汝閨閣中譽遂與約婚去歲之臘始成禮
因汝新經寒疾待春而迎歸焉見汝儀容端潔舉止

詳敏知其爲女士而周旋應對動中矩度無一不稱
長者意內外親黨咸嘖嘖稱佳婦吾與汝姑相對欣
悅曰得冢婦如此家門之福也將期托以宗祀娛我
晚景豈意未周歲而遽失之此何理也莫非余命途
奇而門祚薄只自悼矣謂之何哉前月初汝在本家
邁疾謂是一時偶感旬間始往見之召醫試藥念後
轉甦余始晝夜看護誠未感而知不明醫無良而藥
不靈終不得救汝命痛矣痛矣方汝痛劇時省覺全
迷尙憂余之憂其疾聞余留宿則嘔蹙有不安色余
問痛處則曰小間矣勸之食則強飲汝姑送海榴二

枚昏昏中輒手裹以巾置枕畔余於是益知汝之賢
而乃於病篤時見此數事而已終不能悉汝之美行
受汝之忠養寧不痛惜嗚呼歛以婚衣昔人之最悲
人生之極哀而豈料今日於吾婦親見我心匪石何
以堪之汝沒三日歸殯於我奠饋於我從葬我先人
之兆汝之魂魄其永有所托而屏帳奩匣宛然如常
言貌動作森然在目老夫餘年將何以忘之耶其終
不可忘也嗚呼哀哉

祭族弟憲漢文

嗚呼昔子之來步履軒軒今子之歸旌翼翩翩館我

殞我月未改弦倏來忽逝孰使之然家鄉千里妻子
莫聞行路吞聲矧茲懿親嗚呼凡物終始厥有司命
方生方死曷非先定人寄宇內卽一行旅東西南北
孰非吾土莫云他鄉宗黨滿前莫云窮夭歛襚無愆
故山迢迢言返其骸碧瀾瀾瀾人來鬼歸人情到此
慟如之何瀝酒相送有隕如河嗚呼哀哉

祭鄭平壤錫保文

辛卯上元日婦姪豐山洪良漢今以近故平壤庶尹
鄭公再葺奄屆靈筵將撤身係藩守不能一哭謹將
十行之文庶品之羞使家弟鳴漢讀而告之曰公昔

就館我則總角視我以弟呼公以叔周旋庭闈游戲
文墨契托金蘭情均骨肉嗚呼乙丙天酷我椽藹余
惇惇凜乎朝夕公來翼我飢飽寒燠旣長就科追攀
塲屋公才警妙我性疎樸引繩刮瑕往往推伏惟丁
之春同登庠額逸步高衢如髭可摘我占倖第公屈
蔭籍始宰山縣流尸無瘠出尹箕府案無留牘胡不
公卿且試州牧薄授疲邑匪斥伊擇人或爲顰公則
弗色一別數月遂往不復穉兒星奔村氓巷哭去以
阜蓋來則素帟行路皆涕矧我心曲端詳之姿敏達
之識嗟今之世於何復覲苑彼西園有花有竹姍姍

步履宛如在目去歲之暮我守西岳日月不淹祥霁
云迫緘辭漬繇訴此膈臆言則有盡神兮不隔嗚呼
哀哉

祭李善山 章祐文

昔我冠首始攻時文子年加二居業相隣爰托之契
暨二三子夏日冬夜聯床共被紫閣之陰廣陵之滌
追攀佚宕殆十寒暑子工駢儷導我先路馳騁白戰
建旗鳴鼓我偶一捷子乃三北利鈍之故回適誰揣
出處雖異情好靡睽隔垣招携詩酒淋漓子佩南綬
我秉西鉞千里相望落落燕越去年之臘結以婚媾

子女我婦期永厥好曾未半歲云胡告病醫豈無良
命耶其正端介之操精敏之識才不用世齒未滿德
門闌方盛子獨淹屈三子在前理或可必超然之岡
其水洋洋卜從前言浩然歸藏瀝酒長訣後死之悲
悲兮奈何知也不知嗚呼哀哉

哭仲弟進士遷葬文

甲午四月癸未朔十四日丙申仲弟成均生員宅兆
不利將改葬于鎮川楊花之里伯兄忍將清酌庶羞
之奠哭以告之曰嗚呼自君之逝吾兄弟隻影獨行
頑然苟存居然十有七年矣吾以疎才孤植蒙被洪

造濫躋宰列三哥亦已決科通籍出入清顯門戶殊不寂寥人謂祖先餘慶發於吾輩而如君之俊才宏器敏辭達識無所表見短折堙沒又無一子以受不食之報嗚呼此何理也君之一女幸得成立而忽嬰奇疾于今五六年醫藥技殫尚未成完人嗚呼此又何理也風水之說雖未可究而牛阡之葬本非久計始欲移窆從先人兆龍穴不真積年改求幸占一局於楊花之里去汶阡十里而近瑩域雖異神道無隔冥冥之中庶慰晨昏之思耶吾之少子年甫成童已媿佳婦將以承君之祀後死者之責止於此矣寧不

悲哉嗚呼骨肉分離音容久闕今日旌翼復出地上謂宜握手如平生歡而視之無見呼之不應我心匪石我腸匪鐵悠悠蒼天胡寧忍斯君其有知當作何懷言不能文哭不成聲嗚呼冤哉痛哉

哭亡姪女趙氏婦文

嗚呼爾之生也吾弟之典刑猶在也爾之亡也吾弟之典刑莫憑矣爾雖亡而有子女則吾弟之血脉猶傳也爾無子女而亡則吾弟之血脉遂絕矣今吾之哭汝也非獨哀汝之天也悲吾弟典刑之亡也痛吾弟血脉之絕也嗚呼痛哉爾父之才且賢理宜受天

祿振家聲而不幸短折而無子已不能無憾於司命而猶有一女而留典刑吾見汝如汝父在汝又性婉而慧質厚而靜天之報施宜在於汝吾之日夜期望亦在於汝既長而笄擇佳配歸名族漸忘昔日之悲少慰孔懷之思云胡嫁未踰年而嬰奇疾遍求良醫雜試鍼藥于今六七年終未察其祟而除其根所恃者天與理也今春病又作既無異症不以深憂屢五六日遂不可爲嗚呼痛哉吾弟之賢而不能保一女耶汝之慈良而不能引其年耶吾弟之典刑遂亡而血脉遂絕耶此實余誠淺知昏不能治汝之病而救

汝之命也嗚呼尙誰咎哉汝自得病來嘗以不能侍舅姑修婦職爲恨怵焉如負罪去年汝舅之官于南汝夫隨父往病不及聞歛不能視逝者生者俱爲無窮之恨嗚呼痛哉汝亡之十餘日汝夫至又十餘日汝舅至惟有拊棺長嗥而已人情到此尙復何言抑又有至痛而極悲者汝母氏惻然餘一縷唯恃汝爲命飲食唯汝興居唯汝汝何忍捨而去耶汝其有知則不暇自悲而汝母之悲也不但汝母之悲痛汝父血脉忽然以絕此爲汝不瞑之恨天乎神乎胡寧忍斯嗚呼痛哉嗚呼哀哉

哭亡兒文

維歲次丙申六月庚子朔十二日辛亥父忍將數器之奠哭訣于亡長子通德郎之靈曰嗚呼自汝之去吾側吾居而不能安席行而不能履地食焉不知味寢焉不成眠言若不能出口哭亦不能成聲是真出於性耶無乃蔽於情耶死生理也脩短命也誠使達理而知命則胡至於是然幼而哭長理之順也老而哭少理之逾也使之處逾境而求順理則有不可得矣其可謂蔽於情耶噫父子天倫也賢不肖才不才固不論已然子誠賢也才也而無其命則極痛至冤

又不止尋常慈愛也夫十指雖多割之皆痛者血氣之性也隻眼獨明護之尤甚者輕重之分也吾雖有二子汝弟出後於吾弟汝卽吾之隻眼也四世之宗於汝是托百口之衆惟汝是依其於輕重之分何如也吾年三十始得汝眉眼秀朗姿性和慧愛之如明珠重之如拱璧及其長也器宇軒頤識解精詣篤於孝友勤於問學文藝夙茂步武甚長詩騷古文皆得門路傍治功令屢鳴泮庠前冬旣中陞解今春又捷漢試頗爲少輩所推此特汝之餘事至於敦親之誼愛人之誠藹然由中皆得歡心表裏瑩澈無一滓翳

粹然有士君子之風焉余於晚年惟以筆研自娛凡有述作與汝評隲篇章題贈使汝替寫不直分勞賴以忘憂今焉此事便已吾安得不忽忽遑遑如上所云耶汝於昨夏重經紅疹秋冬以後肌革頗完忽於春初得積聚之症多用攻伐之劑氣敗形削實由於是醫各異見治無一道或言疹熱或言傷寒一月二月如水益下雜試補瀉終未執症竟至於斯天耶人耶尙何言哉抑又有中心痛恨者吾疎於處世冥行迷塗數月之間再遭橫逆汝於病中涕泣憂慮心氣之傷安知不崇於是耶以汝之才性器質宜享祿壽

無一天法而使汝至此莫非吾殃積釁深獲戾神天之致不使吾死而移禍於汝降罰之酷乃至於斯罪實由余尙誰尤哉以汝之誠孝不能暫離父母之側而忽然捨去無復還期汝目將不得瞑矣此吾所以扣心叫天而不能止也鎮山先兆不無餘穴而積雨漫天川路阻塞姑爲權葬於牛耳舊阡此亦先塋之側也神理有知庶可憑依矣嗚呼汝不葬我而使我不葬汝斬衰苴杖纍然而哭此豈夢想之所及而人理之所堪耶嗚呼痛哉西河之喪明君子譏之羸博之三號聖人許焉吾雖不能爲二子役粗知取捨之分

豈忽傷生之戒而情之所發自不能制其真不知命耶汝之一子齒雖三歲生月厯周撫養成立思之杳然而以汝之賢理必有後以我祖先之厚德宜有不盡之報所恃者惟此而已吾所以強食與寢頑忍苟延者亦惟此而已天乎神乎庶幾哀之憐之矣神迷膈塞言不能長汝其聞耶不聞耶嗚呼痛哉嗚呼哀哉

祭亡兒初菴文

丁酉五月乙丑朔二十三日丁亥卽亡長子初菴之日也老父忍將清酌庶羞之奠爲文以告之曰嗚呼

汝之捨余而去今焉歲已周矣日月重回時物如故而去者終不返矣汝真不復爲人矣秀眉清眸豐頰頰唇終不可復見矣自與汝爲父子二十有四年未嘗有旬月之離今乃一去經歲漠然不相聞不獨吾日夜皇皇忽忽如癡如狂使汝有知亦必掩抑號慕於冥冥之中矣天乎人乎胡忍於斯以汝清粹之質祥和之性俊逸之才敏達之識當爲邦國之器不但門戶之光夫旣生之又從椽之何也嗚呼孰使之然哉汝自幼時志氣疎邁異凡兒始余分符月城也汝甫八九齡已能遊金鷄之林陟鳳凰之臺尋角干之

王溪集 卷二十四
墟訪仙桃之山賦詩紀蹟慨然有慕古人之想於洪陽則汝猶卅角而鞍馬從余數百里周遊白馬黃山之間挈舟泛月佚宕吟哦旬有餘日而返於碧城則汝年才勝冠矣春秋行部或隨余後登金沙而望落照臨蘇湖而觀水嬉月波之樓葱秀之壁有題有詠唱余和汝藻思溢發往往出古人口氣時有能詩兩督郵從行無不矐然稱奇其居子舍也屏遠芬華淨掃一室讀經史著詩文不待教導而步武驟長又善筆翰迥妙雅潔有永和風余於是心竊喜吾家詩禮之業賴以有傳而門戶庶幾昌大矣逮余解歸家居

惟以文字遣日每與汝上下論訂多所警發此固爲人間至樂而至於奉先之禮幹家之務賓客應酬箋牘報謝大者指授小者全付皆無不當余意者親黨故舊之窮而來歸者誠心延欸各得其望吾於晚年得以優遊自適專心簡冊者繫汝是賴自汝之亡居則煢煢出則蹢蹢有述作而誰與論評有疑難而誰與講討奉先之重幹家之繁接賓之節凡所以替余勞而補余不逮者事事瓦解老夫餘年將若之何此余所以煩冤痛割愈久愈深不獨天倫之至情而已方汝之喪毋論知不知莫不齋咨悼惜而先進長者

或謂之運氣所關其言誠過然夫以眇然一少年爲人所期望乃若是則爲其父者尤當如何嗚呼痛哉耳溪水石吾與汝所嘗愛而遊者久欲築室退休以娛晚境而事未及就汝忽逝矣乃反葬汝於是豈料人事之回適至於斯耶近余不安於朝無他郊廬可往始構數楹屋於此地時時往來留連懸崖飛瀑礪松溪花莫非汝履跡所經而今不能從余唯有數尺之封埋沒草間而已吾非木心石肝其何忍見此耶然坐而隱几常若汝之在傍出而曳杖忽若汝之隨後臨水倚石宛若汝之左右吟賞則又若使汝有所

憑依慰其戀慕之心而亦可以少寬余哀矣昔農巖金公哭其子觀復之文曰見古人好詩文則思見後生年歲與汝相近者則思有酒食則思遇山水則思草生花發則思風清月朗則思是皆吾今日情界而說盡吾所欲言者也然古人之思也祇以引其哀也今我之思也將以寬其哀也寬余哀者乃所以慰汝心也苟可以慰汝心則吾當寬之又寬而但觸於外者忽然而至發於中者油然而生則吾亦未如之何也已足則性也天也寬之與引之皆非順受者也要之無此身然後無此悲矣復何云云惟有一觴訴此

曾臆而已嗚呼痛哉嗚呼哀哉

祭鄭叅判 晚淳文

昔我邁公并在夬角山房數歲周旋翰墨重以婚媾
呼公爲伯嗟我孤露視以骨肉聯床共研飢飽寒暑
游焉息焉如蛩隨鉅大小科籍策名後先揚于王庭
步武聯翩語默取舍靡小或睽立身事國要歸無媿
我矇于行中遭顛傾公壹於慎終完以亨一疾何奇
三歲不興衰麻以復毀乃不勝年逾六旬壽豈云短
秩至亞卿官非不顯華國之辭範世之量中闕弗施
伊誰不幸逝者日多存者日衰彳亍斯世後死獨悲

有子克家是謂不亡煢煢我姊觸目摧腸卜吉常山
隣我先兆時節拜掃空瞻宿草我徂燕雲萬里冰雪
公不我送我就公訣披帷而哭莫見公面我言孔哀
公靈不遠嗚呼哀哉

哭亡室貞敬夫人文

貞敬夫人東萊鄭氏之喪將以十二月十八日癸丑
卜葬于天安之日峰山下卽遠有期啓朝在邇夫豐
山洪良浩病未能護紼臨穴以初四日己亥謹具清
酌庶羞哭訣于靈筵曰嗚呼夫人與我相遇于今五
十有九載矣艱難險阻旣備嘗矣悲歡欣憾靡不共

耳溪集 卷二十四
矣八耄頽齡相依爲命今遽捨我而去此豈人情之所可忍耶嗚呼痛矣去年秋冬我邁重疾經歲濱危厚貽夫人之憂賴天之靈今我復起爲人而夫人一夕先逝反貽老夫之憾人則謂夫人之完福而我則自悼其不幸也嗚呼痛矣箕範九疇其福有五夫人壽躋七十有五可謂得一之壽矣家雖清寒而食國祿四十餘年可謂得二之富矣平生素無疾病視聽至老不衰可謂得三之康寧矣溫淑之姿端介之操慈惠之性親黨稱其孝睦鄰里服其儉約僕妾感其慈愛可謂得四之好德矣臨歿之日寢食如常翛然

歸化可謂得五之考終矣五福俱全卽人道之至願而兼以鐘瑟偕老孫曾繞膝求之當世殆鮮其比復何餘憾焉人或謂結褵之回甲未滿二朞長孫之會圍只隔數月是當爲逝者之餘恨然此乃世俗之常情何可求備於司命之尊乎惟是老夫白首獨存入室而無與共語當食而無與對床兒孫戲於前而誰與嗔笑乎是則爲後死者難忘之恫矣譬如獨鶴唳月孤鴈叫雲聽之者亦爲凄然而悲黯然而傷况我隻影無伴踽踽而居孑孑而行夏之日冬之夜將何以度餘年乎嗚呼悲夫嗚呼痛哉

祭宗姪領議政孝安公 樂性文

惟公大邦元老奕葉宗子襲訓踵美文敬文懿妙歲
蜚英王國之瑞上結 主知青雲自致黑頭宰樞黃
髮耆社甘考中書贊我變理內無伎求外絕朋比斷
斷無他國耳公耳虛而有容謙以處已生於富貴不
渝素履暮年寬樂備膺遐祉有子金貂有孫瓊珮庭
蘭掌珠滿前環珥園林鐘鼓聊樂餘齒遭際隆平年
豐民墜養威黃扉不親細務有時造朝左杖右几
至尊禮貌都人環視完名厚祿近世無二漢石唐郭
千載匹美哀榮兩至嘉謚恩誅我托懿親情與誼摯

粵自先公視我親弟過加期許不以愚鄙及公策名
步武長第四五十載肩背追跂暨我族叔年爵俱至
煌煌寶帖大書名字選日分會迭舉壽觴春花秋菊
湛樂燕喜梨園降樂太官宣醑先祖餘庥治代盛事
年年歲歲期永勿替胡不憇遺今焉長已三壽並輝
一星先閔公歸在天我將疇倚牀琴虛掛庭鶴自戲
瀝觴告哀老淚盈紙嗚呼哀哉

祭族叔奉朝賀 秀輔文

嗚呼公於小子親則袒免情猶兄弟居連比巷齒爭
一歲聯武班行四十餘禩公先入社我又年至亦有

王溪集 卷二十四
宗相靈壽次第一門三者於古罕比選日迭會清絃
雅吹春花映席秋菊泛觴騷賓獻詩佳兒授几昭代
榮觀壽域盛事韶顏鶴髮君子燕喜香山東洛輝映
當世圓魄易缺台宿遽晦朞月甫過公又繼逝老我
獨存孑然疇倚念昔與公一家知己玄首皓鬢追隨
七紀世稱通才國有髦士宏辭汪洋妙解精詣下筆
千言揮毫盈紙玉堂銀臺不離近侍文學才猷無適
不利闡禦之重方面之寄游刃恢恢罔有劇易華貫
崇秩如履平地掌中雙璧聯袂競美鳴玉拖金家國
呈瑞公乃戒滿超然知止引章乞骸 上嘉其志臨

宁錫麻侈以三字二妙隨車觀者盈市時奉朝請月
致廩餼授子近藩俾供甘旨護以牙纛榮動桑梓嗟
已之春乖氣四熾烏哺未幾猿腸先瘁命之回遁胡
寧忍此始公東徂許我追跂躡屐蓬壺縱棹瀛海風
和日永屈指以俟何天不惠萬事瓦解移宅負墻聊
慰餘齒木稼告災雲車不待鳥語相和松陰連翠悄
然永傷黯然其思我雖公思公不我顧踽踽一世誰
與晤語卽遠有期聲容永閔瀝觴摠哀言不盡意嗚
呼哀哉

哀辭

尹叅判 東昇 哀辭

山有璧兮琢殷之璉水有璣兮綴周之冕鳥有孔翠
 兮木有椅梓其羽可飾兮其材可器若有吉士兮生
 王國表獨立兮朝端荷為衣兮蕙為帶冠切雲兮佩
 琅玕少明慧而修姱兮服詩禮之矩度長穎秀而飈
 發兮騁翰墨之林府屬鞬屈賈之壘兮操戈言卜之
 室弱冠游於黌序兮聲音鏗戛兮文采斐蔚題司馬
 之兩額兮擢黃甲之高第如文豹之變彩兮宛靈禽
 之呈瑞珥筆兮玉墀視草兮蘭臺人傳妙辭兮 上
 詡奇才步從容於清華兮名與實其可珍佩綬兮煦

寒如春持斧兮擿伏如神十載久於銀臺兮 王視
 汝以喉舌忱誠見於納約兮獻替多於停筆據臯比
 於璧沼兮貳權衡於天官周遊兩湖之節兮澄清八
 年之間遂晉階於次月兮遂觀風於幽燕天衢亨而
 漸羽兮紛翼翼而遐騫嗟星軺之始東兮奄二豎之
 來侵皇天之不我假兮君胡不肯兮少淹 重宸為
 之盡悼兮 玉音淒以哀綸朝無絜士兮國喪蓋臣
 嗚呼哀哉幼余好此藝游兮夙求輔於文肆時英妙
 之林立兮公獨超乎朋輩上探滂於命騷兮下浸淫
 於蘇柳採博而研精兮表華而裏奧蠹如其鋒兮擘

如其光照日而生煙兮擲地而有聲子質端介兮提
繩挈尺子性清劭兮彈沐振浴子才警發兮飛丸快
刀子識透詣兮洞髓析毫余顛而荒兮瞠乎躡後齒
則肩隨兮名則尾附雪飄芹宮兮連袂操觚呵冰吮
墨兮燭盡鷄號聲和影從兮如蛩隨鉅子先我後兮
解褐結綬花甄曳履兮曉漏鳴珂齊驂並武兮玄首
已華嗚呼哀哉子病在床兮我就再見執手相眠兮
炯然不眩欸欸兮良規藹藹兮情曲怊悵兮出門中
心兮有戚未幾見兮長逝超恂怳兮永閨乃如人之
清揚兮今於何而復覲俛俛兮末路失我良執年不

稱天兮位未滿德其生也豐兮其歸也全歛此英粹
兮卽彼幽玄去溷濁而蟬蛻兮遂飄然而遐舉風馬
兮雲車廓蕩蕩而無倪脩短有期兮何淹何速不悲
者曠兮悲者則惑我非通人兮心有不釋綴辭以抒
情兮形旣遠兮神不隔嗚呼哀哉

耳溪集卷二十四 終

耳溪集卷二十五目

碑

江東萬柳堤碑

星州戊申紀功碑

梧川李相國宗城龍灣紀惠碑

長興金溪祠碑

寧越觀瀾亭遺墟碑

湖南倡義碑

紫霞洞九齋遺墟碑

昌寧曹氏始祖墓壇碑

長城南門倡義碑

Blank space for the main text of the '長城南門倡義碑' entry.

耳溪集卷二十五

碑

江東萬柳堤碑

已卯為縣宰築堤立碑後按箕營又作後銘改刻以立

川於縣之南曰水晶橫斷腹裏西合于閤波北入于
湏蓋巨浸也比壅而激齧邑治將半余尹茲土亟察
民病惟川之最患顧役鉅重用民及春冰渙水將至
民皆謹曰弗治吾其墊余惟悅以使民勞暫而逸遂
卜期告衆衆競趨壯負石弱輦土掃境竭作九日而
堤成袤千有餘弓高人身有半廣倍之夾堤種柳其
密如簣屹然為巨防衆曰是役也去民大患可無識

王溪集 卷二十五
伐石于堤謁余名乃命之曰萬柳或曰天下之患莫
大於水殷圯耿亳漢憂宣防矧茲堤余曰事無難易
當務之爲若夫增而固之責在後人非吾憂也然有
成則毀理之常也詩云高岸爲谷深谷爲陵何堤之
足恃何石之獨壽姑紀其事以觀物之變也後銘曰
維已卯後三十三載余受方岳旌鉞來屆有萬者柳
夾堤蕤蕤樹與人老子榦孫枝其下民居百竈聯戶
昔憂漂梗今闢良圃武夫挾矢鬪藝作好士女歌嬉
繁陰細草水行不濫尺碑扞疆蜀有冰誓杭留蘇防
石老而磷苔蝕字脫咸言改爲衆志莫奪斲彼蒼珉

紇骨之趾順水桴下載琢載鑪文仍其故書又余手
惟土不潰惟石之壽惟邑豐悴視堤崇替高山北峙
大江東逝

星州戊申紀功碑

并序

英宗大王四年戊申春盜起嶺右內連畿湖賊魁麟
佐夜襲清州鎮殺節度使自稱大元帥先遣其弟熊
輔與安陰賊希亮陝川賊聖佐各逐其守長署置僞
官發倉募衆約日將北上以應麟佐勢甚張中外大
震時星州牧使李公聞變出坐衙召掾佐勵以大義
閱兵械以戒嚴已而按使黃公璿知公有文武才權

署公右防將令發本鎮兵討賊以知禮居昌高靈三縣軍屬焉公揮涕誓衆曰國家不幸凶賊猖獗爾等俱蒙三百年涵育之澤將偷生以從賊乎將効死以報國乎此正大丈夫立功名之秋其各勉之遂書王師字印揭士卒前襟一軍皆爲感激泣下卽馳檄三縣使領兵赴陣剋日會于本州羊腸坪三月丁丑公親祭關武安王廟大犒進兵陳羊腸諸軍皆會惟居昌兵不至偵聞希亮自安陰入居昌奪其兵又聞陝川賊已據邑公急引兵向陝川分遣二縣兵截居昌賊路移牒左防將鄭暘賓使遏賊北上路以高靈縣

監俞彥哲兼中軍據冶爐嶺遮賊南走路又馳檄尙州善山晉州諸鎮爲後援多發間諜諭從賊者以逆順禍福於是海印僧將海琳高靈賊校河世浩等相繼詣陳前請擒賊自効公授計縱遣之進兵至陝川之金陽驛與賊隔水而陳軍容整肅賊皆喪氣時巡撫使吳公命恒已破安竹賊捷報至公卽遣海琳諭賊中徒衆益驚潰邑人擒斬聖佐等四賊帥公遂移兵向安陰陳娥林督諸營晉州兵直趨咸陽金烏兵從牛台峙而下雲峰兵防湖南路高靈兵備新倉賊窮蹙烏散王師進次邑中希亮熊輔等二十餘賊皆

耳溪集 卷二十五
被擒嶺右平遂班師自始起兵僅踰旬矣按使驛聞
上嘉公功冊輸忠竭誠奮武功臣進階爵仁平君公
諱普赫字聲遠龍仁人累官至判敦寧府事公歿二
十餘年星之人士追思公不已將勒石紀功徵文於
良浩良浩曰公之勲名載太常戰功鏤金券何待乎
碑然方亂之作也升平日久人心波蕩列郡望風而
逃竄帥臣擁兵而觀望惟公奮身提兵直擣巢穴羣
醜駢首指日勦滅微公則大嶺西南非國家有也其
功偉矣况其隨方設機先事伐謀不待交鋒坐收全
功兵志曰善用兵者不戰而屈人兵公之謂也星州

之人尚說當時事如昨日而從征將士老死且盡則
必欲鑿之石而傳諸後不亦宜乎遂敘次而系之以
詩曰

惟戍之春方內弗靖三路構亂實倡于嶺公仗厥義
提戈剔藪不懾不疑談笑指顧揚威出奇前薄後扼
不亡一矢羣盜自縛如火始炎撲之滄之如獸將噬
畢之掩之王旅載旋旌旄粲粲士女齊迓牛酒嬉嬉
王報公勞金珥鐵編血牲盟壇僮御土田施于孫子
永世休顯匪勇曷奮匪忠曷勸星山崒崒其石不磨
鑿公之績星人戶歌非我私公公跡攸起公去詩存

王溪集 卷二十五
徵于國史

梧川李相國

宗城

龍灣紀惠碑

并序

龍灣兩國之門戶也荷戈擊柝者晨夕於待變故薄其徭賦蠲其力役以綏懷之然壤地褊而冠蓋交邑入不足以待賓旅養軍校於是有息債之政業商者貸輕而賭厚始皆便之久則錢益滋而民不加積至七十萬緡家授而口分人散而籍存於是有族隣之徵邊民遂大病 英廟乙丑梧川李相國按西節行部徑入灣召掌簿者悉收債券來公會以御史巡邊威聲讐一路令下闔境皆戰沸時權公一衡爲府尹

亟入問曰今索債券將急之耶答曰然權公曰信如是死者多矣願少寬焉公曰是不難卽令取火來權公大驚遽止之公笑而不應促燒之盡權公曰邊門將悴矣公何以善其後耶曰吾有一策耳夫皮革者我國之所贏而中國之所須也若使灣人挾入柵以易燕貨民獲其利官征其稅較諸債息所謂日計不足而歲計有餘者也况我之貨於燕者惟銀而已銀者寶藏也出於地而有限皮革天產也取於山而無窮以此代彼又豈不裕國計耶然行人之西也貨有定包馬有恒數灣商不得與焉及其還也灣馬羣迎

耳溪集 卷二十五
者常數百用此載皮而往易貨而歸其利專屬於灣
灣商之盛府藏之充也其視規瑣息而剝齊民何如
哉權公矍然悟曰善哉非愚所及也然關市之重非
聞於朝不可公曰吾所以疾來者以繡衣之踵我後
將以附奏也厥明御史任公璞果入灣李公語之悉
先使歸奏繼又條列驛聞 上善其議可之於是柵
市興焉山虞獸人捆載四至灣往遼來交手數日而
博什伍之利一如公所畫環塞百里哭者歌流者集
欣欣如再生矣既而權公嘆曰方伯統一路而惟灣
偏受其賜况我專一邑乎遂出重貨堰楊下之浦捍

水種稻歲可得粟數千斛以當一州之租灣人從此
食無稅之田矣翼歲鄭公夏彥嗣爲尹將收楊下之
粟乃曰年穀有荒穰公稅無贏縮是可專恃耶遂立
庫而異貯益之以廩餘名曰察眉賤出而貴入充民
租補軍須存其羨而糶糴之以備水旱之詘微鄭公
則權公之澤有時竭矣灣人旣戴三公之惠謀勒諸
石會有朝禁未果歲癸未余守灣偉前人之績而席
未溫罷去恨未張之今府尹尹侍郎師國告灣人曰
碑之有禁蓋惡夫沽譽之吏諛勢之民也至若除大
患興大利者於古載之祀典寧可掩翳不揚耶况列

郡之頌方伯不在禁也其願李公碑者聽於是進士
洪致一鄉人崔之訥安聖喆等倡于衆伐大石鴨水
之陽以余樂道人善而習于灣事走人千里來乞辭
余嘗謂李公所作為實出等夷其事奇其施遠是可
傳也若夫二大夫功在固圉有不可泯遂牽連而書
之不惟灣人之志也將以勸後之爲方伯牧守者李
公諱宗城月城人官至上相系之以歌曰

灣塞遙遙國之西門民困于貨如墊如焚公火其籍
以財易人脫我禍弇弘我利源昔阡溝壑今安田園
野有桑麻柵有鷄豚載飽載歌哺子弄孫豈曰公德

聖后之仁惟權與鄭有猷有恩耕兮無稅饑則有困
功載于石澤流于民石有時磷民則長存

辛亥正月十六日 顯隆園行幸時臣良浩以吏
判隨 駕十七日夜命召臣良浩于行殿 上方
親製六臣祠祭文出示草本命臣諦看祭文中有
引用皇明齊黃事臣曰齊黃雖死於靖難之時實
有誤國激亂之罪其人不足稱也何可比倫於六
臣乎 上曰卿言是矣點改數字仍教曰曾見卿
作故相李宗城龍灣碑甚佳可謂今之鴻匠矣

長興金溪祠碑

并序

耳溪集 卷二十五
有國之政莫大乎風化而風化之行必本於學校今
之書院卽古之黨庠家塾也然書院彌盛而末俗徇
名反爲游談之藪爭競之場識者病之惟鄉賢祠者
是有德有功而食於社者使土人嚮慕而興起焉無
徇名之弊而有講學之實因以寓黨庠家塾之法則
斯有補於國家之風化矣長興府之金溪祠者卽國
初名臣恭度李公之鄉祠也公諱文和字伯中生而
有異質器度凝重文識淵博少從栗亭尹公學當時
名儒如陶隱圃隱皆推以畏友辛禡庚申以進士中
魁科將歸觀于鄉牧隱李先生呼之曰李狀元贈以

字說勸讀中庸時人皆稱李狀元而不名公旣登朝
見君臣夜宴手拍爲樂歎曰此豈食祿之時耶遂絕
意進取尋以親喪去前後六年血泣居廬人又稱李
狀元之孝及 聖朝革命以潛龍之舊召爲諫議命
按廉楊廣道 恭靖王卽位首擢都承旨 太宗益
知其廉白忠勤再命按嶺南一命按湖南掃剔麗季
弊政南民大蘇公素不喜佛賦政于外一以興儒化
爲先士趨咸歸于正朝廷將大用擢叅贊議政府事
兼大提學公已老矣乞休不許未幾終 上悼惜輟
朝賜諡恭度公有六男曰戶曹判書孝仁鎮撫使孝

耳溪集 卷二十五
義工曹判書孝禮同知敦寧府事孝智判府事孝信
知敦寧府事孝常女適坡平府院君尹璠實誕 貞
熹王后公家以外親清儉謹畏爲戚畹所服斯可見
家庭之訓矣李氏貫邵城世有聞人至公而大顯後
孫散在嶺湖居長興者最蕃公嘗按是道行部過長
興愛金溪水石之勝杖屨逍遙邑人至今流傳遂立
祠於溪上費幣千里來乞文於良浩謹按公見幾於
僞朝受知於 聖主在家而以孝聞莅官而興儒化
名蹟焯然可以祭於鄉塾而南士之志於學者聞公
之風模楷焉藏修焉以振儒教則豈不有助於風化

乎遂敘其大節而系之以詩曰

金藏之山興雲泄雨金溪之水養魚灌稼顯允君子
行高澤長修之一家惠此三方士慕其風民懷其德
有祠翼然瞻仰無斃

寧越觀瀾亭遺墟碑

并序

嗚呼此故學士元公觀瀾亭遺墟也公以我 世宗
四年登第事 文宗官至集賢殿直提學 端宗初
服謝病歸原州及 端宗遜于越之清泠浦公卽其
上流築土爲臺因樹爲亭名以觀瀾日登臨東望與
夫人手灌園藝圃取蔬果納空匏浮于江達于浦

王溪集 卷二十五
端宗上賓泣血廬居盡三年乃歸原州之霧巷閉戶
不見人面從子原城君孝然爲靖國勲臣屏驪徒踵
門請見公拒不納 光廟特授戶曹叅議召之不就
坐必東向臥必東首以終焉方公之在亭也隣有寡
女爲泔澣日往江邊公輒已出坐亭上其女異之請
其故公泫然曰忠臣不事二君烈女不更二夫吾之
來此不忘吾 舊君也其女聞而泣曰妾早喪夫托
身靡所將適人今聞公言身雖賤於心有戚戚焉遂
終身不改適云噫乙丙之際可謂至艱之會也公初
能見幾於未然超然遠引末又盡節遂志以畢君臣

之義其視六臣諸公所謂殊塗而一致者也然見幾
於初猶可及也盡節於終泯然乎無跡爲尤難箕子
之明夷殆近之矣公諱昊原州人少負重望遭時不
幸事蹟無傳焉 肅廟戊寅追復 莊陵褒當時諸
節義特旌公閭士林疏請享公於耘谷書院越之人
慕公義不已就觀瀾亭遺墟願有以表章之公之傍
孫羽孫爲原州判官捐廩伐石方伯沈侍郎晉賢助
成之走人請文於余余嘗高公節而悲公志可以風
勵百世遂謹書其本末而系之以辭辭曰
清泠之水兮上有白雲如蓋有鳥有鳥啼何苦前有

百鳥羅拜 王孫遊兮不歸春草生兮芊緜小亭岑
然臨水水流人去何年水無盡兮名長傳

湖南倡義碑

并序

崇禎丙子金人敗盟大舉襲我三日夜薄王城 車
駕避鋒入南漢敵兵四圍危亡迫於朝夕 上發哀
痛之教徵四方兵於是玉果縣監李公興淳與其弟
大同察訪起淳淳昌縣監崔公蘊前翰林梁公曼容
前察訪柳公楫讀命大哭立草檄告列郡十數日朝
官布衣應之者凡一百六人或助兵械或出軍食約
日會于礪山疾馳北上至清州和已成而兵解諸公

遂相嚮痛哭而散或走入深山或退耕于野終身不
出噫丙子之難起倉卒諸路守土之臣有棄城而逃
竄者有擁兵而觀顧者惟諸公皆官卑而跡疎乃以
忠義激厲提數百鳥合之卒犯百萬虎狼之鋒其志
壯矣其氣烈矣功雖未成亦足以暴於天下而于今
百餘年泯翳無傳湖南士大夫合辭請褒將聞于朝
昌平梁公千運之後錫圭賈倡義名錄千里來京師
以示余議其事余跽而讀作而歎曰嗚呼偉哉是惡
可以不揚然士當危亂之時赴君父之急殉國家之
難乃人臣職耳志雖遂而事未就非所以求其名也

其何以受其報耶殆非諸公之志也錫圭曰然則奈何余曰忠臣不以死生而易心君子不以成敗而計功諸公之所樹立與重峰霽峰跡殊而心同苟使當敵交鋒則一百六人當如錦山之七百義士同日死於國矣是宜筆之書而勒之石以詔後人一以彰國家培養之盛一以勸百世君臣之義不亦善乎詢于衆咸曰然將豎碑于誓師之地屬文於余既敘其蹟又系以辭曰

粵百六之否運有百六之義士嗟斯人兮遇斯時功未顯兮志已遂斲石而表其節列名而張其事壺山之野兩湖之界商旅之所交車蓋之所會過而覽者有不油然而起忠君之義敵愾之氣是無人心也非人類也已

紫霞洞九齋遺墟碑

并序

東方之儒惟崔文昌薛弘儒著於徐羅而未聞以道學稱逮于麗代異教熾而吾道微時則有文憲崔先生首倡性理之說建九齋於紫霞之洞講學授徒名曰樂聖大中誠明敬業造道率性進德太和待聘其進學之序始於樂聖終於待聘如周官成均之制士之應舉者必於徒中學焉咸隸九齋籍謂之崔侍中

王溪集 卷二十一
徒自是儒臣各立門聚徒者凡十二東方學校之興
由先生始世稱海東夫子先生諱冲字浩然生於高
麗成宗丙戌在中國則宋太宗雍熙三年也于時周
程諸賢未出孔孟之道未明於天下而先生奮起海
外獨以斯文爲任其名九齋如誠明率性出於中庸
之訓則表章中庸已先於程子而傳道之功暗合於
千載之下嗚呼盛哉麗訖而國遷文獻無徵微言精
義未有所傳壇齋遺墟蕪沒於荒田之中斷礎零落
尙有存者樵兒牧叟指點咨嗟今海州崔君永壽以
先生裔孫倡多士將立石于舊址來請辭於余不佞

嘗持節海西拜文憲書院述九齋記揭于壁蓋海州
之九齋卽先生之家塾也紫霞之九齋卽仕于開城
時所建也於今八百餘年泯而復彰豈惟多士慕賢
之誠抑由國家文明之化無遠而不顯歟銘曰
松嶽巖巖紫霞騰光有斐宏儒奮起箕方九齋絃歌
厥聲洋洋需于王國蔚然其章世遠跡湮遺風未亡
鳥啼水流草木餘香

昌寧曹氏始祖墓壇碑

并序

天與人截矣往往有氣化而生者若商之玄鳥周之
巨跡雅頌所載不可誣也在我東則朴氏之於大瓢

耳溪集 卷二十五
金氏之於鷄林首露之於金盒耽羅三姓之於土穴是已蘇子瞻嘗言神人之生異於人者不其然歟然則曹氏始祖之生於龍池其理何以異此至若祖與孫形雖禪而氣則一祭祀之薰蒿夢寐之感通歷千百年而靡有睽隔今觀公之發夢於澹雲者理亦無恠矣始曹氏始祖墓代遠失傳澹雲公嘗夢入一神廟若有人語曰盍豎碑乎仰見山下有古塚上有茂草其下土色皆赭前有石大書曹繼龍三字知爲始祖之墓悚然而驚南向再拜覺乃夢也心異之會永川宗人善迪有書曰鼻祖墓在慶州草堤里土人自

古稱曹氏始祖墓而屢閱兵燹耕犁不入或有犯者輒有異故至今溝內無人塚云後又得和順宗人善行之舊譜曰始祖墓在慶州府北四十里紫玉山下草堤辛坐之原善迪之書得之士人之流傳善行之牒出於先世之記載兩符而無差遂遣嶺宗人往審之地形土色兆域向背一如夢所見於是改封修戒樵牧以傳疑焉蓋厥初生民如彼其神精魄必不與形俱盡而澹雲公文章德行爲世矜式天姿虛明冲澹可交神明屈子所謂漠虛靜而恬愉與太初而爲鄰者近之矣是以祖孫之精神沕穆無間聲容若相

王澹集 卷二十一
接焉此豈常情之所可度耶昔柳子厚誌襄陽趙丞
之墓其兒哭于野卜遇深目而髯者自言姓曹指其
父塋誠孝所感假神而告千載上下事若相符寧不
奇哉當時澹雲公老未及躬省墓木亦將拱矣今其
孫晦振追遺志涉千里呼召同道諸孫質以先夢證
以嶺書湖牒叅之見聞皆驗遂拜掃告祭謀於國中
諸孫設壇立石澹雲於是乎有孫矣俞令尹漢謨以
公外孫爲地主克相是役亦可爲能宅相也謹按曹
氏世譜曰始祖母新羅翰林李光玉之女也生有腹
疾長益痼人言昌寧火旺山有龍池多靈異盍禱諸

乃齋沐詣池畔忽雲霧晝晦無何開霽自是病已仍
有身公乃生夢一丈夫來告曰吾東海神龍之子名
玉玦卽兒父也須善視之大可公侯小不失卿相子
孫萬世光玉上其事真平王召見之狀貌異常脇下
有文如曹因賜之姓名及長妻以公主倭人常犯萊
州王命公率衆禦之乃單騎赴陣按轡徐諭羣倭羅
拜曰公天人也卽捲兵歸此事雖未見於正史而傳
來已久不可謂無稽也其後大昌有八平章九少監
東方姓曹者皆其裔也澹雲公諱命教官至天官少
宰藝文館提學上距真平王時爲千二百年矣豐山

王澹集 卷二十一
洪良浩聞而異之爰述澹雲所記土人所傳俾顯刻于石庶幾百世之下咸知爲曹氏始祖之藏而不予其封于其壇慎之至也銘曰

生不形傳化以氣或祓于池腹乃字神來撫頂兒吾子有文在脇王錫氏其車百兩審脩理邦有禦侮讐烏齒八世平章昌又熾若斧其堂千歲秘風馬上下選令嗣寥廓惚恍發宵寐我室爾告不遠邇青青草堤護衣履質諸古牒無差貳物斯怵惕首屢稽大人無占衆手指牛羊不踐四尺巋澗蘋沼芼祭掃地一氣孔神來如水靈報爾孝降繁祉孫維千億不匱祀

長城南門倡義碑

并序

余嘗奉使湖南踰蘆嶺過長城登其南門緬想壬辰舉義之蹟如見諸義士沫血奮拳北首赴難之狀爲之愾然興感而恨未能揚厲于今二百年泯翳不章也乃者湖南諸儒發憤倡論呈于禮部又編當時事實名曰南門倡義錄將立碑紀功跋涉千里求辭于不佞余受而讀之昔在萬曆壬辰島夷大舉入寇舳艦蔽海毒丸利劍觸之皆碎先陷釜山東萊凶鋒直指京城趙文烈首舉義旗與高霽峰金健齋先後摧敗三南瓦解人心鼎沸長城人前佐郎鰲川金景壽

王溪集 卷二十五
聞錦山之敗揮淚奮袂與同郡奇錦江孝諫尹栗亭
軫倡義于郡南門發檄號召於是鄭霞谷雲龍朴杏
村安東自同郡李四梅應鍾自靈光金白谷弘宇自
高敞李隱菴守一自泰仁金瑞石彥勗金蒼泮彥希
自潭陽金梅竹景男洪松菴遠自羅州鄭月村慚自
咸平金晚休億鎰金退憂垓金海翁弘遠自扶安奇
涵齋孝曾朴竹林璟自光州徐朋來澆自興德尹老
坡趨自務安柳執義希津自井邑金叅奉聲振自茂
長爭起來應各帥子弟與家僮鄉少年會者幾二千
李忠定貴時爲邑守助成之於是設壇誓衆推景壽

爲盟主鰲峰金齊閔以淳昌縣監擊破熊峙賊聞風
來會遂推爲義兵將勒兵西向上書獻策于體察使
鄭公澈到稷山遇賊斬數十級前至振威又斬偵倭
十三進軍龍仁聞天將李公如松收復平壤乘勝至
碧蹄驛爲倭將行長所敗經畧宋公應昌主和禁戰
諸義士慟哭捲兵而還退守礪山遏南下之賊奇涵
齋聚義穀二千石由水路輸餉于行在時爲萬曆二
十年七月十八日也癸巳五月天兵復南下諸義將
發檄召散兵李公貴抄送精銳號曰膽勇軍兵勢益
張設奇遮路擒斬賊酋高沛朴儉同又以浙江陣法

耳溪集 卷二十五
教邑兵三百應募者益衆前至咸陽聞晉州被圍景
壽遣二子克厚克純從復讐將高從厚入晉陽城與
健齋力戰死丁酉八月聞南原急景壽招從弟信男
及金弘宇抽壯士百餘人到全州召募兵粟轉而北
上從天將解生大破賊于素沙斬三十餘級奪被俘
男女十七人九月罷兵歸嗚呼壬丁之縕卽東方百
六之運也當時擁重兵守大鎮者莫不鼠竄而鳥散
三京皆沒 車駕西遷惟湖南一路獲全疆土命令
始通餽餉不絕終成復國之績實惟皇朝再造之恩
而抑亦諸義士左右扶挈之力若趙文烈高忠烈二

公奮身殉國忠義貫日月聲威撼山嶽而如長城南
門之舉抑其亞也獨恨不得一當大敵未就雋功而
其志其節不可以生死殊觀也况鰲川兩子暨金公
彥希金公麟渾駢死於晉陽之城栗亭則死於笠巖
之役又若鄭月村尹老坡柳執義相繼戰沒可謂無
遜於高趙之烈矣蓋鰲川卽河西先生之疏昆弟也
嘗受業講學又就正於栗谷李先生鰲峰亦從一齋
李公學涵齋卽高峰先生之子克繼家聲以文章行
誼著名其平日所存不但爲一時慷慨捐生之比也
由是觀之國家之重儒術所以張士氣也鞏邦基也

數百年培植之功於是驗矣可不勒之石而垂諸後
乎遂不讓而爲之序張之以辭曰

維壬之夏炎海溢兮長蛇起陸封豕突兮有髡其首
齒則漆兮千艘連檣蔽白日兮毒丸如雷舞長鎩兮
釜山先焚萊城奪兮火烈風迅莫之遏兮凶鋒直上
指京闕兮列郡披靡如瓦裂兮維高與趙奮忠烈兮
自潭至錦次第沒兮天步遠播邦艱疏兮苞桑之繫
凜旒綴兮嶷嶷義士共沫血兮勦耄白挺勇氣勃兮
蘆嶺之南長城屹兮飛檄遠邇風聲冽兮如響之應
若霧列兮選卒二千思敢決兮選賊熊峙牙角脫兮

進次駒城奮撻伐兮天兵東下平壤拔兮輕騎不戒
碧蹄蹶兮元帥氣沮和議發兮三軍解體鼓聲竭兮
蓄銳齊發肆江浙兮馘斷二酋輿憤洩兮丁酉再舉
時八月兮完山礪山行以律兮素沙一膊天討訖兮
八載搶攘干戈撤兮擲劔解甲反布葛兮維諸義士
南之傑兮忘身報國心如結兮或死或生其義一兮
百世之下風激越兮鯨濤永息尙震怛兮湖水東注
流活活兮有石巖巖彰偉節兮赫赫其光太史筆兮

耳溪集卷二十五 終



